

說部叢書

第二十三集
編三

上海商務印書館發行

軍事小說

卷上

金風鐵雨錄

上海商務印書館發行

金性初敬贈



上海圖書館藏書



A541 212 0000 4751B

舊小說

全部定價六元

零售集

甲	乙	丙	丁	戊	己
二册	六册	一册	四册	二册	五册
二元四角	三元四角	一元四角	六元八角	一元八角	

◎說部之國粹

◎稗官之模範

此書為侯官吳翊亭先生所輯，蒐羅說部諸書，千有餘種，自漢魏六

朝以迄近代，都為六集（分訂廿册共一千二百五十八頁）始於庚戌之夏，成

於甲寅之春，時經五稔，始克蕙事，洵小說中之巨觀也。本編有五大特色，採

取材料，悉出名家，特色一，佚文祕典，竭意搜羅，特色二，短簡長篇，選擇精當

而設，與尋常各小說迥乎不同，特色三，鑑古鑑今，助人興會，特色四，且吳君之輯此書，本為示人作文門徑

已出版，每部僅售洋六元，以副愛讀諸君之雅意，特色五，有此五大特色，愛讀者無不歡迎，刻

愛讀諸君之雅意

◎◎上海商務印書館謹啓

古來親藩以兵力圖竊神器者。惟漢室爲多。卒皆無所成就。朝廷以宗室之故。恣其所爲。貴極富溢。遂萌僭號。然人心思漢。漢廷未有失德。猝起以兵力相博。無繼援之人。成孤注之勢。故往往而劬。吳楚之前事已矣。淮南衡山。有圖叛之心。顧亦知其不可必勝。猶豫莫決。爲人首發。卒莫保其家族。則以漢治未有失。諸侯無因發難。故不能有濟。英之雅各中主也。專制政體行之數百年。國教雖未盡善。朝野不以爲忤。在勢固莫可搖動。而蒙茅孱王。乃合窮巷棘矜之侶。恃二三梟俠之士。欲以圖王。又當斷不斷。前卻如鼠。大河咫尺當其前。導者乃懵然無所覩。悉兵夜襲人壘。兵至而橋梁不具。臨水鬪。競爲敵前備。合萬衆之力。鑿撲新集之衆。宜成禽耳。嗚呼。哈文。拖東。西摩瑟。不無傑烈之士。卒以事非其人。駢死者相望。而悍吏轉得肆其狂攘。以殘虐善類。因之人心日益思亂。英國亂已。不三稔而改正教黨人復起矣。在理雅各既勝蒙茅。宜肆赦豪傑勿問。稍抑天主教鋒稜。以平閭左之心。益修內治。則專制政體。尙

足。縣。久。乃。雅。各。竟。以。兵。力。自。雄。以。爲。誅。一。蒙。茅。全。國。當。人。人。惴。恐。無。復。更。萌。亂。兆。然。已。誤。矣。止。亂。在。德。在。政。不。專。恃。兵。力。苻。堅。完。顏。亮。之。兵。力。寧。能。當。者。胡。以。猝。亡。嗚。呼。立。國。者。果。恃。兵。力。與。淫。刑。也。哉。

光緒三十二年嘉平月閩縣林紓畏廬父序

金風鐵雨錄卷上

英國勳爵柯南達利原著

閩縣林紓同譯

長樂曾宗鞏

第一章

美克一日夜中。聚其三孫言曰。余老矣。平時恆語爾。以生平冒險自百戰中來。顧與言多零星。不復周備。若父若母。聞之屢矣。不以爲奇。而以爲贅。顧余逐年增老。因而健忘。久之且銷歸於無有。一不省記。余滋惜焉。因躬自策勉。乘此仲冬之長夜。逐漸爲爾曹言之。使爾輩貫串一氣。爲老人一生之家傳。爾輩尤當續續傳此軼事。示爾後昆。汝見彼王人白蘭士威氏。堅擁大寶。國中之承平。亦足永賴。國人安常習故。遂不省記當日國家紛亂之由。國民擐甲。自衛其國民。不關刑驅勢逼。其事實出於公憤。義在不得不爲。余今所述。係關國故。爾輩須筆記之。且宜傳播諸人。此時遺老已無一在。無能本其所見。以告汝輩。須知此老輩均身履局中。歷歷任事。今皆物故。惟

余歸然存耳。不能不舉吾事。一一告之於爾。余且將彼陳死人。皆添毫頰。上而生之。摹其勇狀。且徵引。瞥然如煙之已事。幻爲爾輩目中親矚之狀。則聽者當有興致。雖事勢幽曲。百轉千迴。卽死者更生。聞此亦不必云樂然。老夫無恤矣。蓋余所述事蹟。若令彼荒儉聞之。將以我爲滑稽無實之流。付之一哂。爾輩萬非其倫。又當知若祖之力爭。卽爲爾輩今日地耳。爾今生於自由之地。成爲自由之人。則當知爾之利益。本何自生。以天良證之。當謝上帝。汝輩今已踞收穫之日矣。第問當日播種者誰。則先烈流血之所致也。方余在斯託特士皇帝御宇時。爲苦學矣。余生於一千六百六十四年。在哈文村中。村人滋盛。距布斯茅海埠僅數哩。孔道可趣倫敦。余村居久。其地饒沃而疏爽。至今猶然。磚室可百餘家。零星自成。爲積村路。蜿蜒如蛇形。每宅必有小圃。屋後恆長名果。村中有古禮拜寺。上矗方塏。塏上置日圭。皮面剝落。村外則有天主教堂。自政府定律後。中有教士曰布勒欽利。演說於村中。村人大集。禮堂轉闐然無人聽講矣。是時有自由黨者。吾父其一也。雖名自由。亦服國憲。乃不時會於

安斯阿無憚晴雨每於禮拜之辰必大集如是者久會中人均良士有時官府亦臨觀顧以爲非梗化者流亦聽之成聚時吾村亦有天主教人赴布斯茅演禮吾村固小而黨類分攜幾同一國既分教門尤分黨派恪守範圍無復陵越吾父曰約瑟克利格人人稱之爲鐵脇佐爾勇士也吾父少時在克林威爾軍中軍隊曰耶士利所向無敵而克林威爾將軍輒自廣隊中呼吾父名加以獎進後此戰於敦巴大捷遂拔吾父爲領隊自將一軍尋吾父與騎士爭論三人政黨軼事騎士不勝以刀劈吾父吾父亦奮巨刃報之騎士創甚若在他軍則必稱吾父以直報怨非過也然本軍則以爲弗善遂亂蓋克林威爾之軍視同類切不欲見創於人因之吾父與騎士對簿於軍堂幾欲推置吾父聽軍人鼻轡用息衆讜幸護軍子爵入謁軍帥稱枉不爾吾父死亂軍矣已而軍帥發令逐吾父削其尺籍統領克萊克遂褫軍衣及其鐵胄歸哈文變業爲皮商鬻熟革而收生革遂不問國家事而政府竟坐失一名將吾父既行商業乃大昌遂娶麻利施士敦氏爲室教會中女士也父爲長男體幹高碩膊

寬胸廣儀表。嚴毅眉目。英勇而眉濃。幾翳其目。隆準廣脣。每當怒發。脣合不容一線。睛作灰色。光芒四射。偉然壯士也。顧父雖神勇。而對人恆慈祥。音吐洪亮。聞之多震。余至今猶憶。老父聲也。父嘗歌聖經之詞。第一百章。在馬上誦之。巾藍巾。在倫敦中。聲出簷。築以外。與礮聲雜。如高浪轟於海上。吾父威稜及其摠略。才可任大將也。顧既出伍籍。則煦煦如常人。恆云。今日不韞刀矣。果能富者。或更有其時。於是腰膂之下。繫以聖經。謂用此代吾霜刃。父嚴默少所論斷。即對家人亦寥寥數語而已。在演說時。論諸列將得失。則語至侃侃。列將者。一佛力孚。一夏利森。一畢勒克。一伊林敦。一德士巴羅。一蘭白特。此數人後。皆封拜。然此時猶騎土耳其。父生平食儉而飲寡。靜居無樂。惟吸菸三小斗。菸曰阿蘭奴克。父置菸於棕色小瓶中。在移架之次。偶被酒亦縱嘯爲不平之鳴。仇家則目爲狂易。不知吾父之衷熱也。余想父儀容。至今尙能記憶。當查理第二御極時。余於觀劇時。卽思曲中凌夷之狀。與當時同也。以上尙多軼事。顧余年過穉。乃都不省記。問有數事。則未嘗忘。一日爲仲夏之午。炎景流金。鬱

蒸欲狂。忽聞鼓聲雜蹄聲。動於門外。余母遂抱余。隨余父出視。則騎隊過也。自赤齊斯達至布斯茅。大旗掣風角聲。嗚嗚。少年人觀之。咸以爲奇勇。余見馬毛潤澤。高大無倫。士皆鐵甲羽翹。其冠領巾繡美。余少時以爲天下之勇士萃於是矣。不期擊掌稱美。吾父展笑。自吾母手上受而抱之。曰。爾勿擊掌。汝亦兵人之裔。當以慧眼視其良楛。勿垂盼及此蠢蠢者。汝後日臨戎。乃學此輩乎。彼所揭械。黯如黝漆。且含鐵鏽矣。步伍。歷落不復整肅。汝不知乎。即使承平之世。行軍亦重前敵。汝觀彼殿後者之三五錯綜。直至於白亨敦。都不成行。尙名何軍。孺子聽之。吾言非虛也。忽伸其長臂。指騎士曰。汝爲成熟之果。待人摘取耳。騎士聞言。驟馬而至。言曰。汝爲割耳之劣馬。速取而毆之。三五傳呼不已。而吾父徑前。衆乃卻走。亦隨鼓聲而去。吾母大驚。出瘦腕挽吾父。以良言慰吾父。曰。君胸中倔强之鬼物。且令之偃伏。不必梟張。尙有一日。余方七齡以外。見吾父居治革之場。時爲春晝。之午後。門外有二人入。似武弁爲衣。上金縷。所映容光燦然。冠三角冠。余後此方知其人爲水師將弁。路經哈文。見門開。

立入中有一少年操古荷蘭語問吾父。且問且詈。此水師將弁結習然也。語次詈及上帝。吾父正色止之曰。勿喋天而嫚聖。此二人聞諫。詈乃加厲。黨斥吾父爲僮。尙有他詞。則不之悉。吾父怒而出杖。杖二客。落其冠。非其冠。堅者。顧且立。破此客。受杖。立蹶如朽。杌其一。人乃以刀進。吾父至勇。且趨更進。以杖客中。杖創其臂。時叛黨阿德士白羅爾葛士達方煽流言以亂衆心。聞吾父杖水師將弁。乃抗言無政府之皮匠。竟以力創皇帝之奴。殆謀叛也。於是吾父對簿。乃不得左證。且此將弁亦自承肆詈之言。讞始定。罰余父。且令屏居六閱月。則勿罰。余之與爾言此者。蓋使爾知政府之有權力也。此時匪特爾祖信敬之心堅。卽陸軍中崇禮之人。亦復非鮮。然狂易之人。如沙拉士者。恆謂吾甯受刃。不復宗經。謂吾生能自潔治。不爲惡。此卽承天也。恪守宗旨。無敢與格。格則力鬪。無讓。此等固梟俠。然較諸子義僞仁者勝矣。時國民於罷役後。皆變業行賈。凡此不宗經之人行賈。乃大昌其業。至今大賈徧於國中。然溯其祖始。則皆軍中矛兵也。余之言此者。實使若輩知祖宗時歸心於宗教者至。故恆與

是種人爲難。余十二歲時。已有三弟。一曰豪西。九歲。一曰伊佛婁。七歲。一曰佛拉。四歲。時自由黨已逐日演說於國中。特未至吾家。吾父心憂宗教。焦悚萬態。一夕。余將就枕。二弟處吾側。沈酣已極。忽吾父促我立醒下樓。余及二弟大震。挾衣未着。隨吾父行。至廚次。吾母凝坐。慘無人色。抱佛拉於手。父言曰。吾兒趣至旁。吾輩將垂登天堂。救主行至矣。卽於今夕。汝輩將見上帝。吾母曰。夫子勿爾。果天使見招者。殊之牀席與盡之廚次。一也。父曰。婦人何知之。有勿亂吾意。須知上帝之來。多乘人於不覺。於是坐而祈禱。時燈燧燄微。吾兄弟震越失次。環立吾母之次。已而鐘動矣。父聞鐘聲止。啟窗而望。寒星滿天。吾母及吾咸不知狀。但見吾父若癩發。沫噴於唇。揚手四麾。臥地不起。吾母抱兒止之。不能。余及二弟哭於暗陬。已而父起。少定。亦不言其所。以麾余輩歸寢。後此自由黨之來。衆呼之爲第五霸王。蓋自立一宗教者也是。必此自由黨之人。僞言以激吾父。吾父腦熱至烈。故爲此狀。吾之瑣瑣言此。非於言外好增枝葉。殆言若祖熱心於宗教。此亦一端。汝輩聽之。將以爲妄。實則若祖之肝膽真。

擊時輩無及者。且余不言若祖以杖擊彼二騎士乎。官中未趣對簿之先。吾父防騎之來仇復。日省省然備。顧吾父一生無過。但專精治革。交易平允無欺。人恆敬畏。而愛之者無多也。以吾父鎮靜不苟言笑。儀觀凜然。故俗中寡與酬接。卽余少時。偶負微眚。示罰亦酷。吾父恆守古諺。語余曰。縱兒童之慾。令滿者。卽猶縱狗令竊食他人之食。二事皆不足訓。故兒慾宜遏。不當令逸。然尙以吾母仁惠故。父之笞扑。始不時下。平日約束至嚴。不令行諸草地。卽禮拜之前一夜。亦不聽與鄰童跳舞。而吾母者。純懿婉順。以平和之力。感動吾父。入其範圍。使凜凜神威。爲之日霽。然父多憂憤。而母則寬慰百端。均有徵驗。吾母有名教士之女也。敬事上帝。但識之心。不欲矜炫。後此卽吾父所迷信者。觀之始弗之信。一日吾父與吾母論叛教之罪。吾母乃弗答。亦弗言及。蓋吾母之宗旨。恆近於民黨。而弗右王黨。其在吾國五十年之前。婦人極樸。齋而吾母尤賢。但觀其領袖。潔白無玷。而衣縞如雪。觀者不知其內政如何勤劬。始至於。是吾母部署家具。一無纖塵。此猶不足見其內政。且能治甜醬及糖果。與甘酒。

及柑橘之酒。以櫻桃爲布藍地。出之一一精絕。尤聰明能辨藥性。凡村莊田夫工人。偶有微恙。輒造吾家。吾母爲之施治。甚於鄰醫。醫之治人。非得五先令。不獲人以一杯藥水也。於是舉村之婦人得譽者。乃不如吾母。勿論貴賤。咸加禮重。此爲余兒時識吾父母之品德者。若夫余之歷史。當徐徐言之。如年譜焉。余弟皆健碩。爲村童。顧無殊特之質。其挑釁於鄰。與見物而毀。二者均兒童積習。吾父則皆遏而止之。吾父母以外。尙有麻薩者。女傭也。合吾家共八人。而余少年日月卽於此度過矣。至於家世之有屬於余心。爾當靜聽。蓋兒童歲月。初無足紀。而余作如是絮絮者。實於爾輩有益。導汝以塗轍。非矯語也。汝當知之。

第二章

余稍長。頗有信教之心。而父母則旨趣稍戾。時教中人日抱聖經。乃不能明其旨要。使猥賤而溺拘者。終弗解。吾惜當時無賢牧師啓迪其人。幽微之旨。遂不能盡宣。以破其人之憤憤。而禮拜堂又廣有資產。教士擁產厚。本宜傳教。乃堂中位置。竟爲上

流社會所據。而愚賤乃無從聽。吾父滋以爲憂。頗欲求人。以綜其事。使有條理。吾母則謂綜教者。固宜有人。而必屬之政府。若平民。則以教士司之。宗教必如是。始成爲國教。蓋吾母所重者。在品德。設賤愚爲惡之人。特以一祈禱了之。何名爲教。教者宗聖經而始得名。果聖經之旨未明。猶不名爲教士。教士用徹聖經之旨。一不爲惡者也。吾母之意如此。而吾父則不然。意見日左。不左者。則斥羅馬之教爲妄。此同耳。當日英政寬恕。信教聽人自由。而教中門戶既立。乃同水火。亞力山大宗派之教士。則力衛羅馬教。然初不如威廉之衛耶穌教也。衛耶教者。忠勇之心。恆出至誠。力與羅馬教人反抗。且以威力偪之。彼此互搏。久之。乃稍臻於平和。以余觀之。良愚然其爭也。亦不爲無故。前一世紀。余尙未生。西班牙之國力至偉。商舶徧於諸海。兵力之悍。驚人莫與抗。而學問美術及戰陣。均踞歐洲之先。我國與之血戰。爾輩亦當聞之。又當知吾國冒險家。曾渡大西洋。往取其地。彼人執吾俘。以峻法施之。遂以兵力震慄吾海疆。朝野大怒。遂致死力於西班牙。猶劍客之校藝。蓋以強力之西班牙。與蕞爾

之英吉利肉薄相抵。無有退卻。勳爵效阿身。實督師大戰於海上。因之仇羅馬教尤如嚴敵。後此法人頗議英人待羅馬教人薄也。法王亦怒。時王法國者爲路易十四。將以兵伐我。蓋由南提斯上諭中宣布戰事。謂吾英崇尙異端。斥其古教。其罪可伐。於是英人乃大仇法。謂法非爲教來。實挑釁來也。亦以國人不信羅馬之教。衛此教亦弗力。乃同聲指斥路易十四挑釁爲無道。悉力抗法。即崇信羅馬之教人亦舍其信心。同抗外侮。時余年甫壯。已重國恥。不計師來之爲爭教與否。但圖殺敵而已。迨查理第二季年。羅馬之教復盛於國中。朝士升轉。權亦操自教門。英偉之士咸不平。益欲仇教。時貴胄之產咸見奪。爲禮拜寺之用。而查理第二視新教涼薄。崇尙舊教。至於極地。時約克公爵爲查理親屬。爲皇太弟。備東朝。然抗健不齒羅馬教。夫人亦然。時爭教之鋒至劇烈。余雖少壯。亦逐衆生其競心。直至齊密斯第二登極時。能調和二教。民頗稱安。然吾父母則仍歸心新教。斥羅馬之妄。一日爲布斯敦小山墟集之日。演馬戲者施幕於其間。吾母予我一二辨士。令往觀。雖其事不常。而余之受貺。

已多。蓋余年已十六。觀古劇二齣。余至今記憶乃不能忘。一爲威廉哈克壯夫。騎栗色之馬。尤有羅峒侏儒。能自匿身瓶中。其狀至異。外此則絕技。而鏡中影相。復時時現。仙人之島。清幽不類人境。演劇之人。則往來於布斯敦。或來村中演之。其在布斯敦者。乃大演古摩凌事。摩凌者。賈人女。逐情人。安渡那語幽會事。二人遂同至巴利海濱。游行水上。跨石而歌。預語人休咎。咸中。余觀之至適。尙有一日。余以便道至赤齊斯達中。觀波宅佛妻妹遺履。履與常人履同。余乃大懊悔。自是以後。出必以辨士遇可觀者。輒觀之。一日在假期中。至布斯茅。隨父之馬同出。四矚似皆可觀。勿論城堞女牆。與廣衢大道。及巡警兵衛。余壯往之氣。日爲鼓動。偶過巴慶亨公爵家。聞其人見燬於刺客。然余平日尙見公爵虬鬚赤面。乘怒馬行。良將也。余告吾父曰。壯哉。此將軍。吾父聞言而笑。以冠簷蓋其額。弗視曰。噫。是將軍耶。吾於布勒士敦大戰時。但見將軍之背。未見其面。宜吾不能知也。今日傲兀似出於衆。此胡足奇。設將軍能見克林威爾者。必越窗而逃。無復正視矣。嗟夫。天下惟甲裳劍光。最足以動吾父。吾

父。勇。士。直。視。此。輩。若。無。物。也。布。斯。茅。爲。吾。國。重。鎮。皇。帝。以。水。師。長。駐。此。間。有。船。塢。絕。博。水。軍。屯。紮。多。在。士。俾。瑟。海。灣。道。上。水。兵。游。行。如。蟻。面。均。作。棕。色。髮。結。辮。如。豚。尾。或。作。短。刃。形。衣。寬。博。之。衣。語。鞦。韆。不。可。辨。所。言。均。荷。蘭。戰。事。余。恆。尾。逐。其。後。尋。繹。其。語。有。時。直。入。其。羣。中。息。息。相。隨。間。得。杯。酒。飲。之。而。黠。者。更。強。吾。飲。吾。乃。洪。醉。至。以。車。輦。吾。歸。自。余。醉。後。父。母。遂。不。復。令。余。更。至。布。利。末。吾。母。申。申。而。詈。父。則。云。無。傷。也。當。日。那。亞。少。年。亦。復。如。是。且。引。故。實。慰。吾。母。余。少。而。穎。慧。常。依。吾。母。膝。上。已。能。讀。蒙。書。蓋。余。性。與。書。爲。近。顧。家。貧。不。能。買。書。而。吾。父。尚。武。不。樂。爲。酸。腐。呶。呶。語。余。焦。悚。萬。狀。時。向。鄰。村。覓。書。讀。之。得。書。隱。諸。懷。抱。不。令。父。見。遂。入。蘆。叢。展。卷。而。讀。夜。乘。父。寢。則。又。焚。枯。蘆。之。莖。照。讀。父。亦。莫。覺。有。時。讀。名。人。詩。集。則。詩。趣。填。咽。心。肺。其。味。醴。然。佐。以。水。光山。色。其。趣。彌。永。遠。瞭。島。嶼。青。蒼。動。人。乃。思。彼。蒼。繪。此。風。物。增。彼。詩。人。之。詩。令。讀。者。心。醉。滋。可。寶。也。因。念。先。輩。拘。守。禮。法。滯。人。活。潑。之。機。膊。雖。碩。而。見。實。偏。彌。復。可。憐。今。爾。諸。孫。所。見。廣。博。尙。未。知。先。輩。之。頑。固。惟。頑。固。極。始。展。此。局。令。爾。輩。受。倖。福。也。余。年。十。

四。黃髮而赭面。曾入村間私立之學堂執業。可經歲。每月於末次之禮拜六日始甯家一次。所挾無餘書。但有文法一卷。宗教歷史一卷。宗教之歷史。母所貽者。此外別無他書。幸吾師頗淵博。藏書夥。每當得意時。輒出書假學生。余因吾師之力。得略窺淺涉希臘臘丁書。並得已譯英文各種古經史。於是余既周審本國故事。卽他國興廢沿革。亦略識之。余此時識見。乃與體質同長。後此余竟見逐於師。此余所不料者。顧所以見逐之故。則尤當令爾輩聞之。先是村間產業。悉歸牧師。村人叛教者。殊無其人。以信教多。故叛教者。不得僑居其間。司教之副牧師曰駢福。爲村間之強有力者。其人傲狷。好陵轢人。人皆避之。今余與爾輩言時。閉目猶稔其狀。鈎鼻而廣脊。蹙其左足。軀重足輕。行必傾側。故徐徐而步。張其右手。恃杖而行。聲如啄木。道遇行人。必停趾待其爲禮。駢福意必得路人爲禮。始過。顧乃悍不報。人以禮。有時倥偬過其前。則牧師力追其人。以杖指其面。左手揚其冠。示將撻伐狀。余輩遠瞭。卽逃如匹雛之遇土耳其火雞焉。卽吾受業之師。遇亦引避。無復與之迎面。此牧師所蒞地。莫敢

與。牻。牧。師。尤。知。余。爲。自。由。黨。信。服。新。教。之。子。弟。一。日。徑。造。吾。塾。斥。責。吾。師。謂。納。污。而。藏。垢。必。令。斥。余。然。後。已。幸。吾。母。慎。守。教。規。爲。時。所。欽。以。此。之。故。不。見。逐。鄰。村。尤。有。一。學。較。余。塾。稍。大。恆。與。余。伴。鬪。兇。機。已。伏。人。人。咸。知。有。決。裂。之。患。蓋。積。仇。已。深。無。可。倖。免。後。此。時。出。小。隊。攻。取。狙。擊。或。決。期。宣。戰。所。操。械。冬。則。團。雪。爲。球。夏。則。拾。取。松。子。與。土。塊。諸。物。至。於。肉。薄。則。大。肆。拳。毆。罷。戰。皆。少。創。微。出。血。縷。吾。敵。較。吾。衆。夥。幸。余。軍。據。形。勝。以。村。舍。臨。河。錯。綜。三。五。咸。足。避。敵。隨。戰。隨。退。戰。地。本。隔。小。溪。有。橋。互。之。卽。用。橋。爲。敵。我。分。界。之。地。無。論。何。人。偶。過。橋。者。卽。爲。挑。敵。動。必。搏。戰。余。入。堂。卽。逢。大。戰。余。勇。雅。爲。敵。人。所。懾。彼。人。遇。我。飽。肆。老。拳。且。取。爲。俘。虜。因。之。勇。名。大。著。衆。遂。尊。余。爲。大。帥。衆。之。尊。我。不。以。童。孩。視。我。也。衆。旣。見。推。余。意。亦。日。廣。思。以。計。覆。敵。一。日。爲。冬。夜。諜。言。敵。軍。將。夜。襲。偷。渡。小。橋。而。至。橋。固。人。行。者。余。聞。耗。立。思。抵。敵。顧。瞻。橋。板。實。在。村。北。獨。木。支。板。旁。無。闌。干。橋。爲。傍。院。小。吏。所。架。以。吏。居。隔。河。往。來。便。也。余。出。令。余。衆。伏。蘆。莖。中。備。敵。至。要。而。擊。之。大。軍。旣。行。余。斗。出。奇。計。蓋。讀。德。國。禦。敵。之。書。得。兵。法。乃。語。我。

所屬竊先生之鋸潛往斷橋板既至敵尙未來以是日將近耶穌聖節天陰夜黑久不見虜余下令曰誰斷此橋者顧乃無應余勃然曰奇計出諸我我胡引退乃執鋸騎橋板而鋸之橋板欲斷未斷僅容一人不能容巨隊令敵履橋咸立墜嚴冰之上冰薄水僅盈尺非有危險敵卽墜落但如鳧鴨計敵少挫則當懾不更來亦良法也余之智勇亦將綽然有聲於時余同學曰老卡俾實爲前敵引衆伏於籬次其人爲馬文子余斷橋且盡而惜物之心全墮自顧非暴也蓋小橋雖斷苟以匠氏支木其下橋仍可行余見橋身垂陷知吾力功成矣果小按之當立斷乃潛行而歸入吾大軍嚴備待敵方伏身未穩卽聞有履聲履橋徐上伏草際觀之密謂此敵人偵探軍也計此履聲橐橐必爲巨人非童子而行步鏘然有聲則何聲也久思乃不得故聲行且近黑影中其狀甚修已躡橋板上余卜之必牧師矣方徜徉橋上行杖履之聲相和衆乃大震知禍患邇矣竟無術足援其人此牧師悠然弗知仍策杖進截然一聲牧師已渺以巨人之軀仆於薄冰之上衆知牧師之下背觸冰也手足上仰伸

縮不已。久始得岸。拖泥帶水。面上口中。大罵均叛聖之言。余雖震恐。不能不失聲而笑。牧師之起。如失羣之野鷺。水淋其身。余輩見狀。亦惝然而逃。如避丸之鳥。其狀汝輩當能設想。而得余知禍且不測。乃不令余師知之。然卒不能祕。時牧師本自小吏家。被酒歸。熱血方沸。爲寒水氣所沁。乃大嗽病臥。至二禮拜。以人外偵斷橋之盜。循羣兒行迹。直至於余塾之下。牧師大怒。將覆吾塾。余知狀不欲牽動全局。獨出自承弗累。同學吾師濟利佛本。屈居牧師掌握之內。不能留余於衆中。讀古訓。詔余令余出。微覘師狀。狀甚憐我也。自是以來。吾乃不得更見吾師。以吾去後。師物化矣。後此其子繼承其業。學者日盛。吾母聞狀大感。而吾父怡然不以爲忤。且引古英雄少時事。以慰吾母。偉余勇知兵略。一時教會中人亦隱幸此牧師墜橋。當少減其傲兀。無禮之狀。余此後狀乃日碩。成爲巨膊之男子。十六歲能舉巨囊之麪包。及巨甯之酒。鄰村少年莫敢當我能力。擲十五磅之巨石。至於五十六尺之遠。較諸村中鐵匠所擲者遠逾四尺。有時吾父不能勝。巨革余起。自牀席舉如鴻毛。吾父視我若甚注意。

頽白之首引菸斗斜睨不時語曰孺子長此鳥巢中爲時過矣汝不日將振翼飛也
余聞父言自念飛者何時似此村間岑寂如山居甚欲寓目於新世界一覽其勝顧
余南望海波且觀且動余腦彼黑浪而白沫似隱詔英國之少年力趨彼鵠也

第三章

爾諸孫聽此得毋以老人之言爲贅乎然欲廣吾垣非廣吾基不可縱余論列少時
事無可味者顧乃不能不言汝須知前後之根柢則當徐聽老人之言余今言余小
友所交遊者示爾矣余交遊廣不可指數然下此當歷歷知之尙有餘人汨沒於村
居爲爾所不能知者亦有其人至彼人之品德亦須歷陳余少年所友之人曰查培
利爲村間之木匠年事已多駝其背而神清思爽肫然善人也凡事百思所弗到者
其人威能及嗜書如命所入雖弗多然無妻子衣食亦隆約而崇儉偶入其室則積
書滿案雖未抵於牧師及紳富之家而在匠氏中已云富矣書旣徧讀時用以假人
此老每於夏夜輒踞門外凡童子食罷必赴其前問老人以軼事老人則欣悅一一

語之以狀少年中余與老卡俾尤爲老人所愛以余二人夙至而遲歸事老人勤也
即老人之見愛殆如父之詔子不殫辛楚張我未豐之羽翼使文明灌入吾腦無令
生其癥結余二人經事此老如方芽之木豐碩滋長日迅旣輕訓迪覺童子之目幾
欲洞燭天奧老人之言曰史者彰善癉惡之書也試觀巴比倫之盛其繁夥乃甲一
時竟爲波斯所滅而波斯叔末則又爲希臘所滅希臘淫昏復見滅於羅馬羅馬失
德亦蝕於北方之健者天下爲惡之人敗衄卽尾其後此上帝驅人於爲善也矧此
局初非偶然賞罰至爲明晰循環之理思之卽得爾後此壽命愈修則閱歷愈明爲
惡得殃理無一爽故人欲自立固不能舍德行而他逸余於此老人外尙有一人名
所羅門居余隔村其人家世爲水師兵弁曾從紅十字會征法伐西班牙及荷蘭尋
爲飛彈所中傷足乃家居弗出斯人短小而精悍趨捷如狸狴然巨掌猿臂而善戰
自背及股皆黥作異狀所羅門言曾從軍爲生番所縛示我以黥所黥均開闢以來
至於近代蓋一部歷史湟諸一身矣其人能操十一國語且習方言二十三種時時

習之無論喜怒恆輪轉此十一國語言用以詈人吾父深惡其人尋其人漸老亦改行爲善與老卡俾及余爲友每遇歲時佳節必延余二人飲啖所羅門旣周流諸國則習其烹調雜采他國之法用以享且歷述諸國軼事語余言彼當時從軍隨路伯行已渡隨白利克均娓娓述戰事不已雖白利克督師將略不及盟司然亦有足語者余歸述之吾父父頗無忤且以是勵余

第四章

一千六百八十五年五月中一夕余與老卡俾假舟於人行漁於藍斯敦海灣余年已二十一矣而老卡俾小余一歲余素與老卡俾互相標榜而老卡俾亦多力足以匹余故余曠之余每當鬱伊時輒往面老卡俾趨如夏電往來飄瞥短而壯碩絳脣而豐下近漸肥矣彼恆自行將幻其狀爲美人余大笑然自計生平如此友者蓋不多見且同患難至於收局可感也是日招余水行而余一生之史迹亦即肇於是夕於是遂下舳舫划過倭那之沙線及於納北之間其中多巴斯之魚鮮美可食余

乃下石代錨。垂釣忽紅。日西匿雲氣。迷漫日脚。自雲罅穿漏。直射威德之島。草木叢蔚可愛。風自東南來。綠漪微動。濺沫及余。吻味之皆饒。遙望聖斐冷地角。有皇家之舟。方飽帆而行。更有兩桅之船。亦側帆與風拗行。且近余舟。余歷歷已見船人之影。且憂憂聞轉帆聲。老卡俾把釣迴首顧余曰。美克爾不觀來舟。置舵弗把。中桅傾側。今始轉舵矣。以吾觀之。舟人非跳舞者。即搏戰。余曰。吾輩起錨就而觀之。老卡俾曰。否。吾當遠此舟。何爲筦彼人之鬪力。不見彼舟張荷蘭之旗乎。吾輩又安知其來何爲者。設吾身爲賊。有則鬻於新界爲奴耳。余哂曰。何怯爲。吾果奴於新界耶。汝不聞彼舟槍聲發乎。然槍一發即止。少須復發。發後舟人乃大歡。陡轉舟趁風行。其去甚捷。直趨班布利地角。出英國海峽。船行舵乃少下。忽煙燄騰起。一彈向水。水花四濺。去余舟可百碼已。乃趁風南趣。老卡俾大驚曰。此盜舟乎。余曰。吾甚願遇是家之船。取而梏之。實則非盜者。亦必洪醉。吾今且擲吾舟乎。老卡俾曰。可。余乃助之引舟。老卡俾猶悸。余曰。彼彈非趣吾舟。是必夾敵舟與吾舟間。或有鳧水之人。故彼舟之槍。

爭擊水面以理卜之似有物也。且行且顧見浪花之上有人頭出焉。余曰：更鼓吾柁可以振此人。乃大呼水中人曰：汝幸自支厲我來救汝矣。水中人曰：吾在難中君幸救我。惟君宜堅把其柁。吾一及君柁防不勝吾攀。且並墜於水。語已停於水中。余力前收其槳先觀其面。海波至駛。溺人已攀吾舷。大呼曰：幸救我。君須知彼那納斯。吾兄也。乃以辣手寘吾於海中。可哀也。若令吾母見之。又當如何。嗟夫。吾身外之物蕩矣。吾有佳鞵。可值十六德國金錢。得之於安姆斯丹。吾非是不能鳧水。亦不能行。老卡俾曰：足下胡不登吾舟。足下來突兀而語。離奇誰則。審之已見溺人。伸二長臂。徐徐登坐於船尾。高而且瘠。二顴隆起。鬚盡薙。面多皺紋。冠已落水。短髮作鐵絲形。棕色而班白。驟觀之且不知其年。事約言之可五十外也。奔擲水中。登舟都無窘狀。足知其人亦非小弱。目奩至長。而眼光凶射。可怖。遠望似倦。卽之至靈。使精於風鑑。當審其人必非君子。溺人忽曰：吾能於此時游水。至布利末語時。探手於囊。似有所索。且言曰：吾隨地皆能游。其術至精。吾曾於達奴河入水。起格蘭訖於布打時。岸上十

萬土耳其兵皆聚觀欲狂。余且於聖彼德河亦屢試吾技。但問威森俾侍者當能知此智西麻司撒克遜也。今二孺子當從吾言。苟鳧水須納煙於鐵匣中。則不漏。時果出煙。簫以數木節聯之。復出鐵匣。納煙於簫中。以火石觸鋼。卽成火。箕張二足而坐。如東人吸菸。其狀至樂。余見狀及其所爲。深以爲異。不期大笑。不可遏。歷經時始已。溺人不駭亦不怒。徐徐吸煙。旁若無人。然亦時顧盼。余久乃曰。足下恕我年少。以與吾友未見冒險如足下者。不期而樂。今請足下告我姓名。溺人曰。吾卽智西麻司撒克遜。序第十。上有九兄。乃以痘及疫死其八人。留一兄及我而已。老卡俾曰。吾乍聞來船有槍聲。何也。溺人曰。卽吾兄耶納斯欲死我耳。老卡俾曰。發第二槍者。其又何人。溺人曰。我亦報之以槍耳。老卡俾曰。賢兄創乎。溺人曰。小也。余方恨吾技之弗精。第吾入水時。兄乃以九磅之礮攻我。從吾顛飛越而過。吾兄槍法至優。能落飛鳥。溺人語已。卽手拔長刃。去其菸斗之灰。是時老卡俾及余乃收綸持槳。將歸大陸。溺人曰。二子將我何嚮。余曰。將赴蘭斯敦海灣。溺人作擲揄聲曰。果入此乎。汝乃不至。

法國耶。苟至法國者。吾船必當立桅張帆。載取淡水。余曰。吾舟果赴蘭斯敦。溺人笑曰。吾老兵能戰。爾二孺子。雛髮未燥。何爲者。汝須知。余手有刃。汝乃無兵。余今問汝。果何往者。余見此溺人。抗健殊甚。乃舉槳向之曰。汝不言。能鳧水。至布利末耶。今日當以汝爲海中毒蛇。必還汝身於海。方知我爲美克克利格。汝今趣擲其刃。不爾。余槳卽下。老卡俾亦曰。趣去。汝刃吾鉤亦至。利老卡俾遂伸其長鉤。近溺人喉際。溺人笑曰。汝淹我亦佳。事吾生好。試少年勇怯。故用爲戲。須知。汝身鋼也。必欲以鋼試石。知石之堅脆與否。語時。尙引喻數則。皆健男子事。余怒曰。汝趣出刀。授我溺人曰。如約。因鞠躬授刀於余。曰。孺子尙何令。余皆遵。率余已。設喻稱爾爲男子矣。余見此溺人。狙詐百出。乃佩其刀。坐其次。呼曰。老卡俾。汝盪雙槳。我帶刀守此。鹵當無術以擯我。汝言此物盜也。今審之。果盜吾舟。苟至哈文。彼將沒其公道。噬我矣。余見溺人似寒且餒。時時作惰容。少頃。溺人曰。汝不言。爲克利格乎。吾今方欲造克利格。今孺子亦家哈文耶。汝與約瑟克利格何親。此老爲村人。衛新教。最熱衷之人。汝知其人乎。

余曰。吾翁也。溺人大詫。曰。彼乃爲約瑟子。耶。大駭。且笑。曰。吾在危難之中。忽觀奇劇。謂余曰。孺子聽我。因出囊中油布所裹之書。寘余膝。曰。孺子試讀之。余讀其封皮。曰。書寓約瑟克利格爲哈文之皮商。託智西麻司撒克遜爲我致之。此人爲救星之船。東自安姆斯丹。至布斯茅。書用書漆封。鑄至嚴。且有絲布裹之。且云。余有二十三書。當分致此村人。孺子當能知我爲何等人矣。此二十三人之命。及自由。咸在吾掌握。孺子亦知之。耶。須知吾所挾之書。非授提貨之券。與若父。蓋此券中所署。均英人愛國之心。劍光雜以血光。爲國民爭自由。爲國家圖強大。惟此之故。遂冒險至此。以此書與若父。爾爲若父之子。乃敢縛我。獻之公庭。吾爲孺子羞矣。余聞言。卽曰。客何言。我乃不省。幸客告我。以明晰。撒克遜曰。我質言之。能信此孺子不懷異乎。意指老卡俾也。余曰。無傷。彼爲我之知心人。撒克遜曰。然則二孺子良佳。爾知余所將書。蓋爲赤心爲國之人。欲舉事以甦國困。來面公爵雅各。來時各衷甲囊刃。故傳書與此二十三人。冀此二十三人各懷爲國之心。應期集援。今孺子知吾意乎。余本居爾權力。

之內。今授爾此言。則爾之家族。居吾權力內矣。余第一言爾之家族。且立毀爾。尤當知撒克遜者。信人也。斷不爲此。此言與若戲耳。余曰。果爾言確。來意誠者。何以言將引舟至於法國。客曰。此易辨耳。吾第觀汝面。頗溫藹。非凶愚。惟未知爾爲何黨。防洩吾謀。吾不能不僞言赴法國以愚汝也。余沈吟久之。曰。吾將引客面吾父。聽客呈書。果客誠心爲國。不以生死易其節。則吾父將致敬。盡禮於客。惟爾若行詐。市僞。則汝亦不能遽出此村。客曰。天錫爾福。語時甚傲兀。如首輔大臣吐屬。方余與客言時。老卡俾之槳已向蘭斯敦海灣行。順流而趨。遂入小港。余凝坐思此孤客所言。且引目視客所將書上之姓名。一與巴森斯託之士特門。一與阿勒斯福之武英德。一與博挪之佛忒士鳩。他十餘人。均平日與國教乖忤之豪傑。設此人言然者。則此二十三人之性命財產。果懸其腕下。此十餘人素與雅各王爲難。果雅各王得此消息。將躡躍而大行其殺戮。余細審是人。有膽幹而且忠篤。能行大事。乃心服其人。歸刀於客。客亦大悅。抵暮。船始傍岸。將至哈文天。已沈黑。而撒克遜失冠與靴。水淋其衣。幸不

爲巡警所詰。竟至於吾家。

第五章

余抵家時。父母近爐而坐。父方吸晚來之菸。吾母則挑繡於火次。余入門後。客亦徑入。立與吾二親鞠躬。乃道歉。言夜至驚擾主人。在禮爲背。且言幸得二子見拯。伸謝不已。余客絮絮語。不期而笑。吾母愕然。不知客所自來。見客不冠而跣。髮蓬蓬然。長股而鶴立。袴及其膝。二瘦脛立地如駝鳥。衣麤而鈕新。內衫作銀色。微露其緣。高領如荷蘭人。亦白色。長頸拔。出領巾之外。圓顱承壯髮。勁挺如蘿蔔之帶。纓立於燈次。目光上下射人。足恭已甚。語亦滔滔不絕。且引爪搔其頰。其狀大類彼得。戲園中優人也。方余引客入時。老卡俾引余裾曰。吾不之入。防巨禍且臨吾身。吾父縱酒。好使酒心。從基督之教。必不悅此。吾行矣。余曰。善。幸勿洩吾事。老卡俾曰。吾伏如鼠。不復聲矣。語後遂歸。余更入時。吾母已入厨下治饌。刀砧已鳴。此撒克遜老人。則踞巨匱坐。視吾父。吾父掛牛角之眼鏡。方啟封此書。此客新授之。吾父者。吾父引書視其名。

忽而大愕。乃不能動。於是徐徐觀書辭。觀已而覆。余旁立。知書中非凶兆。觀吾父意。且讀且笑。至於再三笑。猶不已。讀已。問撒克遜曰。此書何由入汝手。且此書中之意。汝知之乎。客曰。書中事。我初不之悉。授書者爲笛卡蘭保。尙有數人。其名則不宜告之。足下。我本不宜以性命爲人作此書郵。矧吾非出殼之雛。卽放膽而任此。如易囚之書。吾致之。宣戰之書。吾致之。停戰之書。吾亦致之。凡生死呼吸之交。吾咸無怯。亦未嘗一日敗公事。吾父歎曰。客果忠於所事者也。客曰。吾一身恆關榛莽之途。父曰。此道宜國教中牧師之所不能行矣。客曰。人力之所莫至者。帝力殊能至之。父大贊曰。客言佳哉。因呼余曰。美克引此貴客入吾寢室。汝試簡檢有麻布之內衣。及余最美之外衣。出以供客。並出余靴。靴爲余乘馬所用者。且出余銀色之冠。爲衆冠中第一品。百物悉備。以供此貴客。想客易衣後。吾飯成矣。趣請客易衣。緩將中寒。客曰。吾尙遺一事。因起立。合十仰天祈禱曰。今不宜緩。須謝此全能之上帝。當余入水。不濡此信。且得性命。昔佐拿爲惡人。偪入水中。乃蒙帝力得拯。如我之今日。願帝雖不言。

已如有所示。今請吾友同謝上帝。客遂高聲誦頌詞。且乞帝賜彼榮寵。淪彼聰明。及其同輩咸被福祉。禱已始隨余登樓。吾母此時亦入。見客摯誠禱天。心亦大感。直至禱已始入取綠酒。加以藥點。用祛寒溼。此吾母用藥祕訣也。吾母自受聘。至於成婚後。已無在不以益人利物爲心。故夙儲良藥。至夥。此時撒克遜既易衣冠。氣概凜凜。然異於初來之時。前此獨身出水。直猶海鰻之入吾網。今茲得衣。遂變前狀。飯時與吾母爲禮。儀觀甚美。大類英雄行止。去小舟作謔。時遠矣。此時客亦不言。但飲啖且飲且笑。遂告吾輩以異聞。終乃曰。吾生平慎守課程。凡人受福於上帝。得此美膳。受享何若。卽得福何若。時已徹膳。父曰。客所言。我識之中心。客蓋動心忍性人也。客曰。吾雖中年。身經百戰矣。且言且視其菸斗曰。吾雖瘦瘠如老狗。而豪健善鬪。試觀吾軀。不審被創幾許。大抵所創者。半爲改正教。與土耳其戰也。誠告君子。吾身所灑之血。點幾徧歐洲。尙有數次之流血。實爲國民之公益。至於復仇比劍。其事則甚少。尤恥爲之。天下英雄氣概。每至一區。必能新人眼目。卽以一身表一國。以愛國爲榮。甚

於自榮其身也。吾父問曰：客所憑者何物，得毋劍耶？吾父問時，氣概甚盛。因論軍中所用戰器甚夥，並言：凡此吾皆馴審，無論何人皆足與角。果吾能縮少二十年者，當與客較藝於此中。吾用劍能背刺敵人，多中軍中，無不知之。設上帝佑我，能更蒞兵間，則吾技尙可一試。客曰：吾深審足下能，蓋聞之笛卡蘭保稱足下劍術不容口。且述足下之能於公爵亞吉利，蓋謂蘇格蘭人萬不能及足下也。吾父笑曰：笛卡蘭保乃不忘老夫耶？其人亦健者。吾與笛卡在戰地中馬首相並，而前其在公所中議論亦合。由此觀之，笛卡蘭保將復上鞍韉矣。吾知此人心惡舊教，必欲更革果大事。獲舉者則我亦此語至此止。今則前途莽莽，誰能知者？客忽指余曰：是人亦良將，筋力乃大過人。尤能以英雄自命，吾非妄言者。雖初識此少年，其大段吾已料之久矣。詎此少年不能與吾事耶？吾父曰：須觀後來。因亦注視吾面，似有無窮之冀望。久乃面撒克遜曰：良友乞詳我以事。吾子美克起足下於浪中，但問足下何由入海。客聞言，吸菸至數分鐘之久，如待鞫於公堂。乃自鋪敘其供詞曰：昔者坡蘭約翰自維也納直驅土

耳基出諸國門以外國勢大定若吾輩英雄又何從措手者今寰區均釋爭獨意大利中少形齟齬。究不能卽是中取榮顯。吾因博遊大陸。所經地均承平。無稍覺端。吾遂方洋於海濱。聞昆季二人方司此舟。一曰那納斯。一曰科德斯。舟自安門斯丹來赴基尼亞海濱。吾遂附其舟行。且出資與其賄。方在安門斯丹納貨時。忽有充軍者過其地。其人咸知余專力衛改正教。乃以使者召余往見親王及公爵與笛卡蘭保。此數人者。授書令余分致。吾父問曰。壯士何由入水。客聞言。訥訥不能出口。久乃曰。此亦易辨。天乃佑我不死耳。先是余乞吾昆季停舟布利末。致吾書於衆。此二昆竟出狠狀報我。謂必欲停舟。當予我千餘金鎊。余曰。此亦細事。吾能吾事者。後此必以利益相餉。二昆曰。停舟須以值。余至再陳乞。請於售貨後。取歸其值。而二昆咸怒。忘其夙好。余不能耐。乃出刃。以示吾英雄之概。此二劣爲利所蠱。乃弗以恆情相待。那納斯先發槍。科特斯繼之。吾先奪其槍。去其彈。方余去彈時。知更爲科特斯所得。乃乘機遞入海中。去其革鞞。此鞞華哉。吾父曰。天下僥倖之事。乃至於此。君所欲致書。

之人乃預遣其子拯君。耶客曰然。今尙有二十二書須分致耳。設公見允者。吾寓公家。四出行吾事。吾父曰。丈夫舉大事。安惜此區區者。吾家卽君家。儘居之。客悅曰。公其天帝之忠僕哉。遂起。鞠躬爲禮曰。公家乃似避風之鴻。吾遇險後。得公爲居。停足矣。今當合公家人歌聖詩。謝上帝乎。吾父大悅。乃與之同歌歡樂世界之歌。歌已。客從余入寢室。余置餘酒於其几上。客曰。得此或免寒熱。余出至吾父許。父若有所思。余曰。阿翁何思之深。今日吾拔出此人。果何人也。父曰。其人有才。且以世事爲己任。今日彼之論說。乃出吾意以外。余曰。客所挾者何事。父顏色開霽。出客書於懷。授予曰。孺子讀之。已復曰。待之。吾今夕試籌維。明日腦力稍清時。當示爾。今但乞上帝助我。錫我以光明之道。不爾。吾舉家之命均懸諸一竿之上矣。

第六章

余晨起。執主人禮如恆狀。往推客扉。扉堅。余知是中無栓。且無鑰。扉胡得扃。於是力推之。扉動。知客預移窗。下巨簾。堵門。簾重。故門堅耳。余怒。自語。客居吾家。何爲嚴防。

此非禮也。僂動門闕，客亦起坐。大驚無措，余見客以素巾裹首而寢，髮亦新，薙爲白巾所膜，面目乃如老嫗。蓋夜來所授酒瓶已罄矣。寘之牀下，似客宵來發寒熱，以酒自解者。客少頃言曰：「孺子來乎？然詎是間風俗應爾。凡尊客未醒，乃可力攻以入耶？」余正色答曰：「客之國俗亦奇，以身寄宿忠良之主人，乃嚴扃重門如防盜劫，何也？今且問客：吾家待客何如？客何備？豫之深。」客曰：「否否。孺子尙氣而多怒，我何爲置辯？語已引，衾復臥而言曰：『吾久聞若翁勇健不屈於人，而孺子之高抗，乃不後若翁也。』孺子乃不知吾將何消息來者，非重閉，胡以成大事？實告爾：吾今果託身忠厚之主人家，而主人家客則又未必能一一推測其人，能不防耶？今語畢矣。余將立起，余曰：『客衣吾已晒而乾之，奉以供客。』客曰：『勞哉！孺子尊父所借衣吾服之甚衷，惟服此衣漸耳。余私念吾父衣焉，能不爲客貴？顧客雖與余語，忽復納首衾中，余無語，乃下見吾父。方理劍帶，吾母則及女傭治晨殮。』吾父曰：『美克隨余行，余尙有言詔汝。』此時工匠未集，可以野行作閒語。余於是隨父行於晨氣溫潤之中，直出庭中，踞石而坐。父曰：

吾晨起已在此試巨刃久矣。自覺膂力尙剛。下刃甚捷。疾而峭。勁。余固未老也。乃壯不如人。既老方爲人簡擇而用。可哀也哉。且吾之一身。非當日。鑿鑿隨鼓聲出耶。自較筋力微遜。壯年蓋錫自上帝。亦收從上帝。惟吾身雖老。而腰圍尙博。設臨陣殺敵。氣概必未磨滅。吾意尙望爾能踵我爲之。今且隨吾行。余曰。父命我安往。父曰。孺子勿聲。且勿令汝母聞之。天下婦人心質恆柔。婉易悲。聞之且蹶。今汝且讀來書。汝知笛卡蘭保爲誰。余曰。知之。父執也。父曰。然。其人甚忠讜。許人以事。雖瀝血無所懼。怯設忠義之師。一動彼衣。淡黃之衫。直爲前敵。至死弗挫。其氣合得孫之役。舉議卽在其家。與議者多君子也。余曰。此議非叛乎。父曰。孺子誤矣。汝所疑暗殺之舉也。然行俠而至於暗殺。則直狗盜之所爲。非正也。若笛卡所爲。直伸大義於白晝中。聚其善類。伺雅各查利二王。行次新街。笛卡竟合其徒黨。出與衛士衝擊。幸此二王未創。不爾者。善類當無噍。吾父語時。二目注余。似欲發問。余自念吾父所言。乃不盡愜。吾意謂猝起乘人之不備。卽非暗殺。亦非公道。父復言曰。當日攻王之事。乃弗成。笛卡遂

亡命竟不爲官軍所獲。遂遜下郡而下郡之人不利宗教及政府所爲者亦多。遂推笛卡爲主。四方豪傑爭出。謂苟舉義兵者。必以資從。顧笛卡自知非將才。不敢徑舉義旗。久乃得大將矣。其人爲改正教人所宗仰者。亦名曰雅各。爲蒙茅公爵。實查利子。余曰雅各者。查理擊子乎。父曰吾不之知。國人恆言雅各之母律氏倭忒斯。亦法律妻也。今且勿問嫡孽與否。然雅各恪守改正教之律。爲百姓所推。設是人苟至西陲。則人人將舉梃以應。如春花之蓓蕾。吾父語時。引余至廣庭之隅。以工匠已逐隊入而治藝。吾父乃復語余曰。汝主蒙茅公已至此乎。公甚望國中改正教。人人嚮其蠹影而趨。此外尙有阿其利公爵。亦別領一軍應之。設是間少有舉動。而彼軍卽發於蘇格蘭。二公之意。欲令故教之人。扶服聽改正教人之號令。今聞撒克遜語。當加禮待其人。勿令二公聞之。以余爲鄙薄使者。孺子。汝且讀來書。悉心傾服此書中壯士。能爭國民之所必爭者。吾克利格氏亦在其中。至於開罪舊人。亦無計矣。余乃展書行至隴畝之上。擇林陰而坐。坐而讀書。爲黃紙所書。卽智西摩司撒克遜所貽者。

時爲五月清曉之時。棗棘敷陰之下。余今述其書詞曰、

書寓吾友及吾火伴。告之以教主之意。與約瑟克利格曰。吾友知今日事乎。天將大肆赦以色列民族之人矣。雅各昏暴。及同惡諸人。行將受天之嚴譴。爲萬民所唾棄。必令大地之人。不知有此族氏。然後已。顧壯士旣已知之。卽當趨義以證實爾之忠誠。爲國民爭其公益。殆爲義旣邇。爾不當推託他端。以爲非意想所及。今茲見辱於衆之禮拜堂。自吾國起至於蘇格蘭。幾爲彼人凌巖都盡。幸新教之人。齎集於安門斯丹之村。地偏可以集議。議定始舉。在吾黨中。尙有倭克勳爵吉利。並拖爾倭德。具有膽幹。能行大事。而攀鱗附翼至多。姓名後此當一一知之。至蘇格蘭公阿其利及勳爵巴笛休姆佐者亦數人。皆世之英杰。蒙茅公爵則要結女雄溫倭瓊女。言必將助公加冕。而蘇格蘭人尤欲其種人御宇。遂羣推阿其利柯蘭姆爲前鋒。凡蘇格蘭西偏勁卒。悉率其人。爲衆可五千。五千衆外。尙有同盟之自由黨爲後備兵。自由黨者古族人也。人人寅畏上帝。臨戰深洞兵謀。果克集其

衆則格蘭斯哥形勝指顧得矣。而義兵之力遂及於北方。意羅夫及余同阿其利往徵其兵。想吾書甫及君前。而余足已踐蘇格蘭境土矣。而所云五千勁旅。大率隸蒙茅擇西方空曠之地登陸。而其地亦隱有策應之人。吾亦未敢示君以地。防此書猝落他人之手。轉滋吾累。想足下久當知之。吾今已發書徧告愛國之人。乃吾同盟尅期同舉大事。舉事卽在此數禮拜中。專俟軍械一集。天氣可以適行軍者。全師動矣。吾友心熱救國。當不待見招。必望旗影而集。苟退隱田間。不願與人。事。或年衰力荏。不任苦戰。則亦爲我哀禱於上帝。隱冀此師之成。如古先知所爲。願以余所聞。則足下筋力尙健。王不爲時慘舒。固知足下必能策勵一二用矛之士。授我。或貢餉。矛棘於軍前。則衆將爭頌足下。蓋吾輩所爭非金。特帖此鋼甲。爲生民爭其公益。卽得金亦不爲薄。蓋金自鋼來也。卽使圖事弗成。駢戮於市。則亦錚錚能爲基督教中之人。若微祈禱之靈。幸而成功。則當縱觀此背教之雅各作收局。以彼力敢與先聖爲難。其心大類砥石下之襯石。長日皆受鏽液淋注。無復

潔淨之時。余於斯時。靜觀雅各之作何狀。今但仰祈上天。伸其無所不能之臂。下援吾人。卽投書之人。亦非余深交。但其人以信自誓。願爲投書。設足下往投蒙茅軍中。則願提挈其人。彼言在日耳曼瑞典阿達門數大戰。悉在軍門。悉戰事。似可用也。以上所言。敢邀上帝之威靈。以堅足下之信。理察蘭保頓首。再者。吾書未言及。幸爲我起居夫人。請讀提摩太第二章之書。自第九節及於第十五節。

此長書。余讀之至愼。讀已。納之腰橐中。遂赴家晨餐。行時。見余父以目遙注。似目中有無窮意嚮。問我而我意則變幻如雲煙。亦不審所從答。是日撒克遜告行。出二十餘書。分投村中壯士。去時。言斯須卽歸。顧撒克遜瀕行。余家幾搆飛禍。余與老父方議投書事。而余幼弟豪西。必欲得吾父藏火藥之瓶。不期擲瓶於牆次。礮然作聲。衆皆不審其所然。父母咸大震。撒克遜坐於方榻。而背之所嚮。適當火藥發處。乃夷然不爲動。若無事然。幸藥發無一傷者。卽豪西亦無恙。余乃大服撒克遜之雅量。而撒克遜亦無言。徐徐出門而去。長衣古貌。冠老父之冠。幾翳其目。余幾失笑。自念以此

狀將祕密之書踪跡。將爲人得矣。顧村人好奇。亦不知其爲奸宄。但聚觀之。不加撲取。撒克遜儻然自行。且行且弄其行杖。蓋客之思致至高。故發露於外。滋以爲適。吾父見客奮勵。而熱心亦暴發。余則深爲客危。且不以改正教爲然。思欲引避其事。若必不得已者。則余亦躬與其事。至客之主於吾家。吾二親則以良友所遣之專使禮之。無敢少懈。惟余更事未多。不審其去就。意其抽我純淨無腥之白刃。從吾父揭義旗耶。抑兩無所附。作壁上觀耶。然吾父又安可背。今惟從父行耳。若以宗教之奧妙。余固未能深審。如天主教耶教與舊教反對之教。余皆有所取。不必專附一教。以立門戶。尤不能爲教之故。代之流血。且擁立蒙茅。未必卽名爲正。余何爲助之。惟人心款附至此。又似有勢之可憑。人言蒙茅庶孽。非天潢嫡派。吾儕小人。何與其事。而吾尤生長村間。不能自決其向背。顧情極勢迫。指顧間卽當決之。不能濡忍須臾也。余思極無聊。取冠外出。步於村間。沿路決策。爾輩當知余居茅茨之下。聞見拘陋。一旦令我決廢立大事。智珠從何而得。時余經老卡俾門外。其父奔出。引余入飲卯酒。卽

曰。吾今日以佳釀飲孺子。且出酒且贊其美。老卡俾曰。美克爾體質甚碩。當以酒助爾壯氣。老人亦曰。美克是間有壯士某某。以力自矜。君胡不出而與角。余曰。匹夫之勇。勝之非武。亦不足爲哈文增。其輝美。且吾非巨獍。丈乃欲我張齧露齒。示村人耶。丈須知彼此。卽有勝敗。亦自戕其同黨耳。法當制服巨敵。方爲男子。老人曰。此正爲哈文增輝美耳。旣而曰。壯士言當似此區區者。安足以屈英雄。以君之材。勇隱此荒村。直似以葡萄美酒飲老農。辜此酒矣。君意殆謂博大之英吉利。方足容展布。叢爾哈文。非蛟龍興雲雨地也。雖然。壯士旣抱大志。胡爲隱此治革之場。老卡俾卽笑而謂余曰。吾父之意。殆欲爾爲四戰之武人。不當抑抑居此。幸能以身向敵。則爾之皮革亦將爲人礮磨。如爾家之治革矣。老人斥老卡俾曰。爾身短而舌長。可怖也。美克聽之。老夫質言勸爾。爾若久處此殊辱沒豪傑之年光。以老夫爲若策者。趨向大陸立戰。以成全材。勿奄度流光。至於頽暮。老卡俾曰。酤家恆言酒愈老。則渣滓愈多。斯言偉哉。余點首曰。當熟思之。遂引手爲別。已行。經查垞利先生之門。先生方治藝。仰

首見余。卽曰：孺子。我尙有異書奉假。余謝曰：方有所寓目。卽前此先生所假美頓詩集也。今所欲假者。究爲何書。先生釋斤曰：書爲洛克所著政書也。雖論說未必卽行。若果行者。則可以屏羣書勿觀。此書吾將卒業。明日可以奉假。爾須知洛克奇才。心薄政府。在勢宜。憐然自行。胡佻佻。侃侃居於權臣肘腋之下。作乞憐狀。余曰：遜遜多君子。先生當以爲然。先生曰：是中果多偉烈之士。老夫獨不解地產之良。悉皆上道。無一留爲國用。老夫知反正之時至矣。人人將力復其自由。余老矣。將不及見。果能苟延吾齒。則吾國必成爲改正教之國。其事可跂踵而待。余對曰：流人果得間者。必將擁立蒙茅。事正未可料。先生立停其斤曰：流人之尊蒙茅。亦假其虛無。設故王果見逐。則下議院或不之許。故王卽不復辟。然亦當更立親藩。且處蒙茅之後。眈眈伺隙者。正復有人。一觀蒙茅入嗣大統。行卽蠢然動矣。余曰：長者之言。吾信之。卽吾有言。亦必取決於長者。設蒙茅果起事者。吾將仗劍往從之乎。先生撫白髭良久曰：此事固重大。然以爾名父之子。則爲汝決策。亦非難。雅各卽授首。而天主教弗除。終屬

禍胎猶之疫癘。傳染隨遇隨起。故誅雅各。不如去天主教。舊教滅則暴厲之萌絕矣。果使爾能合流。人迸力以廓清區宇。除舊布新。男子職也。孺子爲村中勇人。以爾之勇。自足爲之。惟茲事行之固險。而斷不能不行。成敗正未可知。而大亂之券。則老夫久操之矣。然上帝匪所不在。可以爲證。汝卽吾子。吾言亦矢不改口。汝行可也。先生語時。聲顫而悲。復運斤不已。余少立。乃出語謝先生。行時。彌味先生之言。余行未遠。忽所羅門至。余前。余乃弗覺。所羅門呼余曰。汝經吾前。乃不吾禮乎。余曰。船主幸恕我。我適有所思。故未及見。所羅門曰。汝狀正如吾船觸霧而前。前乃無顧耳。語時自行向籬落而去。復迴顧余曰。朋友無多。汝今傲兀。如是不猶海行遇舟不下旗。以爲禮乎。吾恨身不居舟。果居舟者。礮發矣。余曰。船主幸見赦。吾晨起心緒蝟集。故惘惘至此。萬死萬死。所羅門曰。汝乃不知所羅門耶。其人爲舵工。勿論如何。犯我必仇。勿憚西班牙及荷蘭之人。矧乃汝耶。忿然自去。余見狀大奇。遂歸入面。吾父曰。謀定矣。請從吾父。吾父肅然曰。然則帝力偉矣。必隨地護汝。不落敵手。惟汝心當鞏固。爲帝

盡力余此入黨人門戶矣

第七章

吾父定策後。遂飭行事。厚儲糧備供。余及撒克遜。而部分家事尤精審。蓋吾父年鬢既高。行事至慎。且鄰村多天主教國屯。方搆人心。愈焚吾父者。村之閒人也。苟形迹爲人所得。禍且遘及。然吾父機宜至嚴密。風聲一無所漏。百凡皆備。不逾一旬鐘間。卽首塗。而村人初無一覺。吾父乘墟集購得二戰馬。寄諸黨人之家。令謹飼之。二馬一斑爲狀。至神駿。高近十七英尺。五寸。其二稱是亦駿品。余字斑馬曰連盟馬。宛轉隨人。甚可余意。撒克遜乘棗色小驕。西班牙產。牝也。名曰格雷。以撒克遜最後飲於酒肆。當釺之女曰格雷。因以爲名。吾父怒曰。名是得母瀆上帝乎。撒克遜不答。然鞍韉之屬。吾父已預拊搆。其次則軍械。以軍械之故。吾父至與撒克遜忿爭。蓋二老咸宿將。各言曾用之甲冑。或重衛手足。或重衛胸臆。久爭不衷。一是然。吾父仍重胸臆之甲。甲上尙著矛痕。蓋在丹巴之戰所貽者。余試着之。吾父臨觀。甲小而胸博。較吾

先。祖。尤。偉。己。而。兩。裂。其。甲。縫。貫。之。以。繩。則。稱。體。矣。而。護。其。臂。股。二。甲。則。假。諸。國。民。庫。中。並。長。刃。一。手。槍。一。此。數。械。蓋。爲。戰。士。所。必。需。吾。父。舊。冑。以。遺。予。其。中。襯。溫。革。輕。而。且。堅。余。擐。甲。竟。撒。克。遜。及。吾。父。皆。稱。余。爲。選。將。撒。克。遜。亦。密。購。得。鋼。冑。及。長。鞞。勝。以。小。刃。手。槍。則。吾。父。所。贈。者。余。三。人。咸。得。至。蒙。茅。軍。中。戰。具。已。備。無。復。他。求。是。時。國。家。方。亂。盜。賊。縱。橫。行。客。必。以。械。出。卽。披。甲。以。出。在。律。亦。無。禁。囚。之。余。二。人。出。行。乃。無。疑。者。卽。有。見。調。之。人。撒。克。遜。已。夙。儲。應。對。之。詞。報。之。謂。余。對。人。言。宜。趣。謁。標。佛。公。爵。亨。利。珊。姆。色。忒。以。標。佛。爲。余。家。古。族。發。祥。地。請。余。作。妄。言。以。答。邏。者。余。告。撒。克。遜。卽。雉。經。我。亦。不。爲。妄。語。撒。克。遜。見。狀。張。目。搖。首。不。能。答。久。乃。曰。壯。士。苟。履。戰。場。則。守。信。之。奇。癖。當。立。更。以。兵。不。厭。詐。如。何。不。作。妄。語。余。思。撒。克。遜。之。爲。人。人。極。惡。猾。似。寡。讀。書。者。生。長。兵。間。故。習。於。行。詐。以。妄。語。爲。實。事。似。兵。人。宜。如。是。者。至於。設。計。埋。伏。直。行。至。下。流。之。事。亦。所。弗。惜。以。情。逼。勢。促。則。方。知。詐。謀。爲。無。上。彼。軍。中。所。尊。爲。首。領。者。其。人。但。知。深。秘。其。兵。謀。爲。不。可。捉。捫。之。語。前。此。森。拉。之。戰。威。廉。令。人。僞。敗。敵。遂。陷。其。伏。中。

似無狙譎之謀。兵家乃大以爲能不斥其妄。彼韓尼伯未用火牛衝敵之先。不嘗使羅馬大帥信其遁走耶。卒乃成功。甯非無信。似此大功偉績。均以先哲用以詒後。吾乃於是習得狡圖。故亦僞語人以赴標佛。實潛赴蒙茅。則亦遵先哲之權術耳。撒克遜語至矜伐。余仍無言。但言不洩君謀而已。撒克遜聞言釋然。知余非固執者。余此時身去村舍履戰地矣。凡與余同時之人。今其人同履墟墓。無論也。爾輩倘欲知當日之英吉利如何者。余當述其成迹告汝。今余語所論。或與名人柯克及奧密遜所著之戰記稍異。第余之所言。非身歷者不能言。爾輩儘可以余之所歷。助爲史料。及爲私家紀載之左驗。此時爲一千六百八十五年六月十二日。黃昏之際。忽新聞至余村中。言蒙茅已以兵登岸。屯於萊姆地。爲小海埠。埠踞都什及特翁之間。而布士敦小山之頂。已露夕烽。此余第一次聞警者。已而蹄聲與鼓聲交雜。自布利末來。矛棘森然。羽檄紛馳。貫村市過。伏鞍而趨。立向倫敦。而布利末中守將倉皇不審所爲。余輩在斜日昏黃中。望小山烽燧。而烽勢東趨。忽見有短人馳馬至余門。次且喘且

言曰。是間有約瑟克利格者。居此乎。余父曰。吾卽其人。短人以鞭指余及撒克遜曰。此二人者。均足恃乎。父曰。可。短人曰。吾輩當大聚於拖東。君可以此消息示吾輩。且乞餌飼吾馬。及水。趣來。勿延。吾將馳矣。余幼弟豪西。注目觀來者。似甚疲。余乃引之入室。授以啤酒。余弟乃引客馬食飲。其人入時。狀甚獠怪。額上有黑痣。襟上塵土已滿。手足均木強。下馬跛而始行。使者言曰。吾馳死一馬矣。此馬乘二十哩亦必死。惟明日須至倫敦。以吾輩甚盼鄧佛斯兵及獠兵就中舉事。吾卽於前夕出蒙茅軍中。大王高纛尙飄揚於萊姆耳。余父乃問曰。王之勁旅如何。客曰。兵少而將多。兵則沿途收取也。與王同來者爲倭克子爵。曰。吉利德國將軍曰。倭德餘列校可百數。至時殞者已二人。似兵兆非祥。余父曰。何事遽殞上將。且尙有他變乎。客曰。工程隊弁與佛勒察爭馬而死。彼中村農咸呼。欲得蘇格蘭人之血。指佛勒察也。佛勒察趣舟而逃。其人本宿將。撒克遜曰。識之。然西方之士。均百戰之餘。方且鬻至。失此一人。胡傷爾果。謂其人宿將。宿將乃勇於私鬪而殺人乎。於是撒克遜徵引故事甚夥。客似不

悅撒克遜曰容吾暇時更聆清誨吾今將馳赴赤齊斯達以時促不能久留矣今日正吾輩伸眉之秋苟伏而不出則爲奴將及累葉無已客顛頓上馬力馳而去余父大聲呼余曰美克時至行矣復顧余母曰爾勿哭匪特勿苦且當以善言慰撫若子令張王其氣須知臨陣作烈丈夫形汝婦人亦不之見且不宜聞果使戰潮及於是間汝家人必見我父子騎馬同行今舉家同跪禱乞此全能之上帝佑余長征時大衆咸跪余父慷慨見於言色且禱且虔言必成功而反今日余髣髴尙見當時情狀吾父手背之筋僨起舉手向天哀禱上帝吾母默跪父旁而仁藹之容淚交於頤氣咽不敢發聲而哭防哭時爲余減其行色然諸弟尙居樓上但聞徒跣往來聲撒克遜者則跪伏於一榻之下伸其長膝於後以面伏其腕默默作禱詞時家人咸踧微燈之下余四矚家具一一皆與余習充塞滿眼其居火罏之次者則高枕之榻數具壁間則懸基督歡喜山圖其餘家具雜沓均一一可增留戀然此家具而遊子臨行之心不期皆嚮此微物余自是行後乃不見吾家余遂決然出門入諸戰塵之垓心

聽其簸弄矣。是時禱罷皆起。獨撒克遜尙伏可一分鐘。乃起。余初以爲撒克遜暈也。撒克遜自陳彼之祈禱用多詞耳。余父則以手撫余項曰。祈天賜福。戩此大兒。父乃引撒克遜於屋隅。余微聞金錢聲。知余父饋贖於客。而余則爲吾母所抱。以方紙納余手。語曰。爾於閒中讀之意。謂苟從吾父母慈訓者。母心當逾樂。余再拜奉命。惟謹。遂出門。而撒克遜已趣步隨余。後行時已逾午。過威西孚已近。老所羅門家矣。彼幸未見我戎裝。果見當大愕也。時村人咸臥。旋經查垞利之門。而扉已啟。先生自門中出。散白髮被寢衣。呼曰。美克吾侑。汝久且預聞蒙茅至矣。余思爾之行。必不更留孺子。勉之。天賜孺子福也。爾奮其力。慈其心。以溫藹處弱者。以威猛處強者。斯得矣。凡與爾習者。必代爾禱矣。余執先生手至堅。此蓋余末次面吾村。而先生之道貌尙留吾心目。中先生蓋立於陰黑之處。揮手送我也。余徑行至自由黨懷德爾家。撒克遜卽其家。披甲上馬。余亦往。引吾馬鞍韉已具。以吾父得耗時。已以人示寄馬處。使其夜備。明日二點鐘。余馬已與布斯敦相望。余身已擐甲勒馬。望蒙茅旗影而進。

第八章

余行次遂抵布斯敦山脊之上。四望見布利末燈光及舟。中星燈在余左次之下。其居於右者爲柏爾大叢林。其中亦發火號。似示水軍登岸處。而巴西爾山峯之上。烽火亦接天而生。逾巴西爾外目力所及也。萬火鱗列。自火中察之。似兵耗已遙傳及於北克。而東漸於薩色。土火或聚朽櫬而爇。或以松香之油著於竿上焚之。余馬經布赤斯德而守火者聞蹄聲咸大呼。蓋以余爲國兵西也。而撒克遜則左右余馬前且行。且歌詩。詩意皆爲國。且言曰。吾輩此時至自由。不必每語雜耶和華矣。余曰。客詠詩佳。能鼓舞人之志趣。客曰。然。凡百艱劇。吾誓守吾志勿失。余當日見囚於土耳其時。檻余至斯鄧堡。同囚者凡百餘人。百餘人中。非飢疲而死。即斃於杖下。或至今日尙關械於巨獄之中。余思其人必死於笞箠之下。不爾或爲異教者。縱槍而死。余獨倖生至此。可慶也。余曰。客何術自脫於險。客曰。得天賜我聰慧。幸以術全。以余見彼異教凶穢。至不欲身陷其中。圖遜遜也。於是道出博梨趨官道。道上多沙礫。余思

前途不知作何狀。而家鄉在邇。尙係吾思。客沿路言。余皆弗答。時雲盛。月沈。有時穿雲隙。而出微微。見道路旁。皆廬舍。林園櫻桃野果之味。奇馨。倂人撒克遜引馬並余馬。曰。美。克。汝。怒。時。曾。手。刃。人。乎。余曰。未也。客曰。行將聞鋼聲與鋼聲觸矣。邇時一見敵人怒目。則先代格言及親賓告誡。咸不之憶矣。余曰。格言告誡。吾少年聞亦無多。惟老父詔我戰時。必力想吾此劍。可穿入鋼片。定不吾闕。撒克遜晒曰。士鏗特伯之劍。當以士鏗特伯之力運之。吾相君劍犀利非凡。良無媿。古代力爭宗教之刀。以刀之鋒利。即由教力之入人。蓋能如是。卽爲教門聖人。宣力蔑不勝矣。撒克遜復言曰。觀汝氣概。似不畏強敵。余曰。然。撒克遜曰。少年乃與我老劍客同技。惟爾力爾精。皆勝於藝事。當時時斂抑。方爲行軍之上。着吾嘗見行獵者。輒自稱能取水鳥山雞。在獵場中。神氣傲兀。自謂無敵。實則山雞水鳥無敵我之械器。吾以強陵弱。勝豈謂武由是驕氣。旣張。轉欲身臨大敵。而吾轉不能要其必勝。此非謂足下也。足下之堅勇。吾滋信之。且古語云。非戰功而得勳爵。固爲非榮。然亦不能以勳爵加諸善走者。余

日設與客同赴戰地。歷百戰之餘。則不至喋喋不已。試觀吾父終日。有一言乎。有威力者。固嚴重也。客試以告我之言。告吾父。亦將厭客喋喋矣。客聞言怒絕。余亦大怒。撒克遜忽改容曰。少年幸赦吾。勿殘吾尸。進諸蒙茅營壘。今茲且勿私鬪。試觀居吾坐次者。爲何村。余曰。斯威林村。吾行已十五咪矣。東方已微明。忽矚見地上有物。橫臥。撒克遜咤曰。是必不具草榻。乃夜臥於路。余卽微光中更矚。果似人也。以面就地。曲二肱於前。以首伏枕其肱。余曰。詎醉人耶。撒克遜以鼻嗅之曰。空氣中似有血腥。吾度其人非睡殆長眠矣。乃下馬掀此臥人。曉光下燭。面色灰冷。果死人。撒克遜引手入尸囊。卽曰。此人殆遇盜。其囊空矣。卽袖圓亦渺。殆爲盜取。余曰。創自何所。且視其尸。撒克遜曰。刃自背入。首爲槍跌所擊。死尙未久。顧已盡傾其囊。以衣物觀之。似非下流社會之人。錦袴而銀其鞋鈕。意必有重賞。爲盜所有。撒克遜曰。美克吾遂撤此死人前乎。前途當有警。余亦瞿然曰。然。撒克遜曰。吾大有機遇。能遇此殺人越貨之巨憝。今當尾盜而取其資。匪特爲死者索還其貲。且足得盜之所有。今但焉置此。

尸。余曰。謂取而瘞之乎。撒克遜曰。美克果未經戰陣矣。設不藏此尸者。則明日人將曰。夜中過二壯士。卽有伏尸。則將謂我殺之。詎不受囚於人。余今乃不能藏此尸乎。今與爾當寘尸於密林之中。則禍始不及我。余下馬視尸。扶尸入於亂草中。以樹枝蓋之。撒克遜曰。美人體偉如牛心。乃如婦人。余最躪撒克遜言。撒克遜曰。行矣。須勒我韁繩。犯此險地。吾閱歷久。遇盜無數。彼盜雖老。無回首之日。似此不公之貿易。直寄身鋒刃。無足恃也。余曰。盜豈無善終者。惟地獄中。斷不能曲恕其人。此牧師恆用以告我者。設爲盜。居諸寰中。旣不能富。復受雉經而死。死後復入地獄。則其人之生甯非自犯荆棘。果爲盜者。咸如今夕之劫人。飽饜其橐而去。則人人皆奮而爲盜矣。設使此盜更遇強有力者。奈何。盜果知情。則斷不以他人之生命恣其溫飽。撒克遜曰。諒哉是言。方盜之越人於貨。所思則大異。是撒克遜曰。前趣近俾西斯敦矣。其星光瑩瑩。又何地耶。余曰。以大勢度之。似倭森。撒克遜曰。吾輩趣前。吾意欲於未明前至沙利巴利。可以少息吾馬。待夜更行。以此時疲極。人馬均不適於用。聞此數日之

間道上多邏騎及馳檄之人。吾晝行將爲人得。設晝伏而夜行。去孔道少遠。施行向沙利巴利平原。嚮珊姆色忒斜陂。或不遇邏者。余曰。設未至之前。蒙茅已宣戰者。又將奈何。撒克遜曰。然則身首異處矣。今勿論如何。果使蒙茅大敗而散。則爾我兩義士。正當出身宣言。爲國家至此。與蒙茅角。果如此者。朝議或以爾我忠盡。得采地封矣。孺子爾勿以我爲誠。斯語與孺子戲耳。爾我當驟馬登陂。吾馬尚有餘力。惟爾馬瘠矣。言已復前。天色微露。蔚藍且雜以絳雲之絲。余卽趁微光下。泰拉淺澤。遂及羅西。已望見南亨墩朝煙縷縷而起。直達於東南嚮而止。更遠則新樹林籠於薄靄之內。余行時。見數騎士馳過。似傳急檄。乃不及詰。餘尙有車數輛。厚載羊羴。車重莫能進。見余行次。車客尙與余爲禮。余此時及丹希利。居民方晨興。啟窗見余騎曉行。乃及扶闌之外。觀余。余驟馬向邸營。而日光已穿漏。力祛玫瑰之雲片。令其四散。杲杲日上矣。空氣中蟲飛如沸。晨氣清潤。中人而水色山光。爭貢厥媚。余及村店。遂下飲麥酒。少息飲馬於池。而村人乃無談及亂事者。似民心一無所袒。有時但言布蘭地。

之稅果常在六先令八辨士一加倫之間。及酒罈勿漏者則吾聽其何人柄國。吾民不之理也。余自邸營向沙利巴利是爲孔道。旁有大澤夾之。草木叢蔚。水沮洳出其下。斜施見小村落。村近威爾西之邊。余自飲馬後。馬力乃大肆騰蹕而前。時日出氣佳。馬力復健行者。大爽覺深黑之長途。至此若別成境界。卽道覆之。尸亦旋忘其狀。但見野鷺羣飛。及魚鷹三兩出沒於澤中。聞余蹄聲。爭鼓翼逝。行經草積羣鹿突起。草間力趣叢林而沒。叢林盡處見白物不審何狀。瞥然遽逝。余尋問之土人。則云野馬之屬。猛鷲乃不能近。已而日光大上。覺此日中之世界。又驅人治事矣。晨氣旣佳。而余之血管亦彌覺疏爽。余僮人不圖旅行得此異境。心乃大悅。卽此老伴亦欣悅。馬上輒發聲而歌。歌爲老伴所習。歌者今乃溫之於馬背。歌已。謂余曰。吾思蒙茅近。日必未宣戰。然以吾策之。以速爲上。凡起義兵。須先發。鼓盪民志。且及雅各王旅未出之前舉事。方足嘯引義旅。惟王新自國中來。糧械必未備。以大數計。僅能發五千衆。若更少者。敗矣。至於軍火。尤必人荷一槍。不足於用。則資及矛斧。卽矛斧之屬。咄

嗟亦不易辦。吾患百凡未具之先。當有小戰。余曰。吾惟望發難在余輩入伍之後。撒克遜曰。蒙茅大將無多。然分隸各部。亦正寥寥。吾輩今赴拖東。第恐至拖東時。乃不見王耳。惟拖東中曾聞有巨富之天主教民乎。余曰。未也。撒克遜曰。遇有富祿。必悉金銀之器。及他寶物。酬我忠勤之壯士。天下以身臨敵。果不得其輜重。則從軍何爲。非飾其尊。而不儲其酒耶。孺子不觀樹隙中有匹馬繫耶。吾意林中必有巨室。今吾二騎且往求之。但爾力能允我否。孺子識之。此馬非若父假我劫人者。余曰。客何言。撒克遜曰。吾言却彼巨室。若翁不能分吾贓也。余曰。吾父安須此者。客不觀山跌之下。日光映射禮拜堂之屋脊耶。以道里計之。吾行當過其下。撒克遜曰。然是中必富碩。吾初征利。俾瑟卽得銀蠟臺。古物也。鬻之。僅得價四分之一。而余兩衣囊已滿貯金錢矣。余方語時。而客馬竟與余聯行。余迴面卽見撒克遜面蒼而古。不知歷幾許風霜矣。披甲而長瘦。手足皆修健。自其鋼胄之下。見胸前之甲。隆隆高起。鞞長及膝。余自日光中矚之。知其人良老戰士。其踞鞍也。奇穩。神采英毅。作時。時撲敵狀。惟所。

發之音吐多離奇弗實。但以其狀。余固知其善戰。無尙矣。因語撒克遜曰。彼林外作光明滅者得毋阿溫河耶。然則吾去沙利巴利僅三昧矣。客不答。但注視禮拜堂之塔。亟贊其美。且曰。吾思前人無他事。但日增其塔層令高。然吾讀戰史。壯士亦多臨敵。胡能以其餘力增高此塔。余尙勒馬行。即答之曰。想此禮拜堂當日必奇富。以當時豐碩者多崇飾外觀。乃愈形其惰。忽見林外有人。余即曰。老伴。是人或告我以戰事乎。語未已。騎士已露。人馬皆泥滓及塵汚身。而騎士猶絕馳。似賽馬之人。力爭其速。撒克遜乃勒馬道中。呼來騎曰。西方有新聞乎。騎士喘息言。少舒其轡曰。吾方馳羽檄發自萊姆。府尹之署。尹曰。格利高利告諸政府。言叛黨已集。如蠶之開衙。衆已數千。諦溫全村。皆應叛黨。子爵吉利爲鎮中後備兵所卻。顧雖卻走。而自由黨皆蠢動於海濱。爭趨蒙茅。騎士匆匆語後。卽馳而亂塵已高。如瘴霧。余二人復行。客曰。吾輩之來。乃以沸瀋更置之火上。以吾觀之。瘍且癘矣。吾輩儘可去匣。而永露其刃。無論勝負。富力掃此村鎮中之市肆。令無噍孺子聽之。今茲登場矣。量力趨戰。嗚。余曰。

客不聞吉利挫耶。客曰：嗟哉孺子！少挫胡傷。此騎殆小接耳。且所退卻之兵，必非蒙茅所得之精卒。且蒙茅動兵，何由至此輿僻之區。與人角勝，吾觀此路，非足以用兵。小隊相突，卽小勝。小負亦無涉於全局。今垂至沙利巴利之衢，孺子且勿聲事。至乃更決之。且圖食飲，更議首塗。於是並馬向塵肆中。肆曰：藍豕。余二人遂下騎，以馬付肆人。撒克遜氣概森凜，示肆人以喂馬狀，靴刀之聲鏘然入門，立臥於溫榻之上。以足加別榻，大聲呼肆人作武士蹇態。且令肆人曰：爾趣以酒及饌至。肆人聲諾即行。撒克遜復曰：爾肆中有雙疊銅機之榻乎？有花露噴漬之衾褥乎？余二人馳馬疲極，宜食及息。爾勿合水之法國酒，用代漢那之嘉釀。爾須知吾挾吾火伴至此，力支世界之大事。卽示爾輩以真姓名，亦無所怯。蓋吾亦爲所應爲，設吾不爲是者，汝輩亦齏粉矣。以此慘厲之語，合彼威烈之狀。肆人乃震懾無倫，急移他客之饌供我。以隔房，尙有二弁須飯久。今我奪其飯，而二弁乃大囂詈不已。而余二人之食則甚甘。食已就寢，遂入黑甜。其甜不可狀也。余睡可數句鐘，忽聞有異聲發於樓下。且有軍械。

之聲雜以駭叫。余大驚而起。見吾伴已不見。留空榻焉。樓下聲囂不已。撒克遜聲亦在中。余不及甲握刃力趨而下。時廳中及甬道咸奴媪充塞都滿。肆人戰慄而立。余力擠至廣廳之上。家具已縱橫四擲地上。破盃但留其屑。蘋果沙梨絳桃四散零星。雜菓子戲與盤盂同一狼籍。撒克遜挺立門次。手握短刃。尚有長刃倚之股際。其與撒克遜對立者則一少年將弁引目四盼。如有所覓。余覩其狀似亦吾輩。殆爲昔伯志邦二宿將之部曲。此外尙有二人與少年同立。咸握刃。余乃趨近撒克遜。亦以手握刃待敵。撒克遜忽曰。今將如何。以吾思之。是必爾之長官。不授爾藝。乃施此軍械。非歟。此三弁中有一人略壯。卽曰。爾之所言。吾不甘受。縱使吾藝不逮。亦莫堪此辱。然吾尙有折衷之言。吾火伴躁動。乃急於挑釁。想老將年長。或能恕之時。三人中尙有一人至豐偉。有儀觀。言亦如之。且曰。果老將能見容者。我爲緩頰。必不得已者。則願與客鬪。撒克遜曰。二客殊有禮。余胡敢不承。因騰足蹴還少年之刃。曰。後此勸君用劍鋒。須上仰。則中人矣。不爾手背示人。直授敵人以隙。苟擊汝手背者。刃且立脫。

少年拾刃其狀甚慍帶刃力趨入闕也少年旣去撒克遜遂及此二弁安致家具余亦助理撒克遜曰吾今日爲葉子戲得三女王方大呼得意而此少年乃力趨阨吾吭以貢三瓶良釀怒而搏余且彼已被酒故無禮至是而應輸之酒復不自承二弁曰老校聽之彼年少人腦筋壯烈君今日訓迪以藝術彼思之當佩君惠三瓶良釀彼當立出君火伴亦足助君盡此酒余聞言卽曰吾方穠睡而樓下戰聲如沸在此小肆中胡鬪丈夫之鬪須戰場耳幸二君慈祥使吾友與少年不至流血可慶也今四人列坐呼傭保以酒至中有一弁曰少年足於酒矣新酒當歸吾輩吾胃似有酒窖藏之良佳不圖今日以葉子戲之故竟成一劇且吾輩觀撒克遜先生葉子戲如弄其刀乃此少年冒昧竟逞其兇暴於老將之前眞爲吾輩解嘲因問余曰君友周歷數國識見滋高較諸列弁爲長此少年荷士佛漫無知識遂至拔刃正以此少年未經大敵故以怒示勇殊淺人哉余聞二將言悅甚因借此酒與二將攀談冀訂交誼言次遂念及吾父言凡王家列將均梟悍凌人之人以今日二將觀之則老父之

言。又似固執矣。余聞二將言。滋以老人爲過。設此數人者。非衣短後之衣。去其佩劍。亦兩文人耳。何由知其爲武人。余此時與之言。竟及理化諸學。咸能對答。且有見解。而吐屬風雅。密邇人情。似出自有學者。中有一人語撒克遜曰。丈行周數國。曾見賢哲有學之士。若法國者。若日耳曼。其人如何。撒克遜乃不能答。信口恣談。均浮泛虛妄。令人欲笑。此二弁者。乃笑不可仰。竟不卒聽。酒闌天晚。遂起告別。二弁咸曰。此負氣之少年安適。當往尋之。慰以正道。用蓋其恥。此時吾當歸營。此營當於今夕拔隊。與察斐爾兵合。因問余二人曰。君乃西行耶。撒克遜曰。吾二人乃屬標佛公爵軍也。二弁曰。吾初以君爲波孟之後備兵耳。今乃爲標佛兵耶。吾思標佛者。必極力禦敵。俟羽林軍至時始止。撒克遜曰。察斐爾兵數若何。二弁曰。騎士八百。雖兵止此數。而尾其後。尙有一勳爵斐佛亨。以步兵四千助之。余曰。吾輩苟未撲敵之先。一遇戰場中。當同飲平安之酒。語已。二弁已去。撒克遜微語曰。美克言此滋有術。能令主客皆喜。若以此術媚婦人。婦人當悅。然戰場之中。當以刀矛相見。不必以酒。吾思蒙茅無

騎士不足以抵王卒。余問撒克遜曰：此二弁丈何由識之？撒克遜曰：吾初赴寢，可數句鐘立醒。蓋在軍中久，恆少睡。立起視汝，汝似睡中益之以睡。吾靜坐寂寞，不可耐。乃聞樓下有樗蒲聲，遂以資入博，視其所挾，吾資廣也。余資多，逾彼輩十五幾尼。在衆中宜占首着。此少年乃不見允，且語且詈，力與余忤。似化學之藥料不同質而強合者，因之大競。此少年者，乃引化學之例，意似譏。余曰：爾藍衣之騎卒，與化學胡涉。此間各有自由，胡爲喋喋見困？少年大怒，猶戰鼓之趣鬪，似非鬪不可者。余聞撒克遜絮絮語不止，殊不欲竟其說。時已日暮，且飯。余意當於未飯之前，週覽門外風物。是間有禮拜堂，至廣博，在勢不能不入游矚。穹門高峙，甬道至修，日射玻璃之窗，光彩射目。余與撒克遜觀已，遂歸。見此村鎮中，四週皆編柵，遠見有三猛狗，赤目張吻，作噬人狀，爲人所縛，而伸舌於外。余問村人曰：是狗何爲者？村人曰：用此狗於沙利巴利平原中防盜。此狗能覓強盜藏人之所。余聞言後，遂歸。至肆，天已曠黑，余遂用飯。飯已，理資上道。臨行時，忽憶吾母於行時，以箋置余囊中，余乃就燈下讀之，而紙

上。尙。星。星。帶。淚。痕。也。嗟。夫。吾。母。憐。兒。乃。至。此。乎。書。曰。

此書爲麻利克利克之妻。告其子美克者。時爲六月二十日。在救主一千六百八十五年。美克者爲大事而行。若古昔大關之王。出與江利亞教人爭戰者。邇來。天主之教。漸驕恣。不衷於道。喪其道。實在法。宜。遷。信。教。者。之。心。入。英。國。改。正。教。中。以。國。律。尊。之。今。予。告。兒。行。軍。時。當。知。此。教。節。目。吾。謹。聯。書。以。待。其。自。決。

第一節。衣。須。時。澣。也。吾。預。藏。衣。二。襲。於。馬。鞍。囊。中。設。不。足。於。用。者。可。就。道。中。購。補。之。吾。聞。西。方。羊。毳。之。服。甚。佳。可。稱。爾。服。

第二節。凡斫兔足懸之。肩上者。可已腸結之疾。

第三節。晨起夜中。咸當祈禱。且誦聖經。如馬可書中讀法。

第四節。達甫之迴魂藥水。其力甚偉。能清人之血。凡中寒中熱。生狂。易萌噩夢。被風熱。均可祛之。每服以五點爲止。余已以小瓶納爾手槍槍洞之中。其旁裹以木棉。防瓶碎也。

第五節爾內衣中余納十金鎊於中以針密縫之爾勿遽動留之以備不虞。第六節爾當努力爲上帝討暴而靖亂惟爾戰時勿輕身赴敵當俟閒隙而進戰時勿急遽宜鎮定鎮定則不餒卻矣爾處處須念改正教方能恣其勇力。嗟夫美克爾爲我光前之子當完全爾身以就汝母不爾者余心裂矣須知作此書者日夜爲兒祈禱兒當知我心也。

余讀書已而戀母之心動淚如瀑瀉顧淚雖奔湊心中滋服吾母部署之工想吾親愛余切故作此協律之書授我余此時心緒麻亂藏書不觀以撒克遜已披甲上馬呼余首途。

第九章

余行甫出村鎮可半咪忽聞鼓角聲自黑影中出此騎隊過也逆旅中二弁已前告矣撒克遜曰幸吾輩出不爾或爲樗蒲之少年所值且陷不測且吾之素巾安在汝見之耶余曰未也撒克遜曰惜哉是必格鬪時遺落此情人贈我者失之良悵悵今

茲且勿論。但論來兵。騎士非八百耶。設余後此更見此二弁者。當更與語兵略。則當悉心兵間事。不兼及於化學格致耳。彼輩未經戰事。言之適以我爲妄語。次復曰。今茲濃黑。行且安適。今惟去孔道稍遠而行。不與官軍遇。吾模糊中似見有人作偵探狀。可怖也。今當趨過平原之東角。嚮威爾西出西摩瑟邊界。爲道至穩。然夜中與官軍避道行。其行乃甚紆。時行近官道之側。聞蹄聲甚雜。余呼撒克遜曰。暗中何人馳馬。乃如是之偪。撒克遜曰。然。今且停騎樹影之中。出刀以待。似此騎卽尾余者。不爾胡連綴而至。今且伏樹間待之。已而騎士近矣。初不覺。余二人之拔刃以待。其初騎士他趣。忽而馬驚。知有人在。乃勒馬近余。呼曰。停騎者。非美克耶。余曰。然。來騎作狎。嚙之聲。曰。余爲黎邦老卡俾。嗟哉。美克。我宜與爾抱見。但聯騎時。防爾爲我牽綴。而墜馬耳。且此馬久無人乘。用行長道。不圖今日乃用以追汝。余曰。黎邦。汝來何爲。黎邦曰。我所事卽爾所事。吾之宗旨亦正與撒克遜老將同。今立馬若後者。非歟。余遠道辛勤。不圖於此見之。此老熱血如沸。吾至款服。撒克遜聞而笑曰。汝耶。可謂家畜。

之雄雞出鬪矣。黎邦曰：吾亦男子，今且勿論他事，但勒馬前嚮。吾以騎隨爾，明日當至拖東。余曰：吾至愛之黎邦，不圖中道相逢。若翁不有他語乎？須知此次旅行，非猶學堂中之假期，苟不成功，收局大非易。縱使獲勝，當從血華中馳騁而出。若無天幸，則纓首亦在咫尺。黎邦曰：吾弟勿惶怯，凡事自有天命。鞭馬前矣。吾此時以一身並刀馬同獻於改正教之元戎。戎曰：雅各者，即蒙茅公爵也。余聞言亦趣馬同前。猶曰：汝卽區區數語而止乎？此時逢爾，吾心乃愈沸。惟吾年來友汝，未聞汝言宗教及於政治。今日忽爾出剛決，爲國民爭其自由。何耶？黎邦曰：吾身非王家，亦非蒙茅所有。勿論何人御極，求予一釦，亦不可得。亦不計國律之更革，議院之需人。蓋余身之來，爲美克來也。我身自頂至踵，悉屬其人。果其人匹馬陷陣，余必隨之舍疫死。外余皆力尾其人，與同生死。老卡俾語時，馬忽騰擲，竟墜於叢林之內。口中言曰：此第十次耳。且立且言，且攀鞍上曰：吾父語我御馬，須如其勢，勿急勿躁。一經躁急，立蹶於地。撒克遜曰：尊甫言然。彼月分牌中所圖者，均天神。汝今誰肖者？身未臨敵，已屢墜。騎設

遇大敵不幾陟方爲神耶。黎邦曰：宿將勿哂。吾當盡余力爲之。我或有非常之舉動。出敵人所不料者。撒克遜哂曰：確耶。吾正恐爾所言過確耳。語已。勒馬傍黎邦。余亦縱馬夾其左擁護。令其勿墜。撒克遜曰：老夫昨在逆旅中擯一少年。其人不能逾美克。或較汝勝耳。汝但行。須知逐吾後之王師。其狀皆爾汝輩。今當時時磨練。臨敵自不疏失。須知天下人果有技擊之能。亦萬無必勝之理。試觀善用七首之繆拉。在凱沙大軍中能運劍斷敵人之釦而不壞其襟。後此遇羅瑯那。竟死其手。羅瑯那者。走卒也。其運劍乃如足下之試馬以走卒。所運之劍不審劈掠之能。但知直刺。繆拉初不之備。竟直貫胸際而死。一亦因羅瑯那猿臂能伸至四尺以外。設以技擊論之。繆拉必不引咎。顧已洞腹。乃不能自明其冤。黎邦曰：如丈言。吾之不能兵。苟爲敵所知。而敵又善劍者。吾不其休耶。因顧余曰：吾晨起造汝。乃不見。因往查塔利先生訪問行踪。尋悉汝已行矣。吾亦決計舍此村而就汝。乃赴所羅門家假劍。而吾父適赴嘉士坡。余乃入廐簡馬。余愛吾父切。殊不敢盜善馬。騎向戰地。因而倉卒出行。長道可

一日道行爲人所沮者可二次余乃答以支詞竟脫於難余既再瀕危難知去爾近矣蓋余在沙利巴利逆旅中見有人捕爾二人撒克遜忽曰有是耶黎邦曰然似邏者知爾爲叛徒而逆旅中羣聚而議第不審爾出何道撒克遜曰是必此少年往告其侶因而尋余今當趣行捕者且立至余曰吾輩去官道遠當無及縱使見捕安得至此撒克遜曰理固宜然當善備之今試以馬蹄東嚮令留其迹後乃西耳撒克遜語已力鞭其馬黎邦及余隨之絕大澤而過行經老杉之中角鴟野狐大嗥而起余馬逾數淺澤四乃無聲但聞鷺鷥之聲與野鷺鼓翼出於頭上道旁多蛇莓子縱橫交糾馬不能前幾陷於窪已而至溪次橋圯已久臨流不能渡乃驅馬絕流而過半渡時微見燈光知是間似有人家然且前且渺久乃都盡余三人立馬於萬靜之中黑影直接天末月輪出雲隙如籠薄霧且作月闌光至慘慄余粗能辨路而前不審所屆馬乃徐徐而前復時時顧追騎而黎邦者馬上敍余去哈文後情況余且行且聽黎邦呶呶作聲如蛙鳴此時撒克遜引轡聽黎邦語忽爾凝伫似有所聞叩其

鞍橋曰。追者已至。吾傾耳聽。似有十餘騎。吾今將與蒙茅別耶。余曰。以頭顱予之足矣。此外尙何物。於是三騎同馳。疾如電逝。幸二馬尙強健。第黎邦之馬行經日。筋力已罷。似不能更騁。余靜聽己馬之聲。似遠遠已聞近騎。余乃曰。黎邦似此罷馬。當立蹶。果爾。當死汝。黎邦作悲聲曰。前蹄且蹶。似無濟。但幸去官道遠。或不爲追者所及。撒克遜曰。彼藍衣者。行已經月。彼馬亦瘡。且又安知余之出此。太息未已。似有異聲。且似鐘聲。與空氣至和融。不知其爲何物。撒克遜曰。意其狗也已。而又聞作數聲。相和答者。撒克遜曰。是必禮拜堂之前所縛之獠狗。數句鐘間至矣。爾輩宜堅坐。一墜馬者。立膏狗。吻黎邦曰。嗟夫。天母。吾本投骨沙場。不圖竟死狗禍。然則出我意料之外。撒克遜曰。吾臨觀時。此物實繫以鐵繩。果見及噬吾馬。馬死。則人亦殭。今且奈何。惟入水方泯其迹。黎邦吾馬殊弗濟。更數分鐘者亦殆。設吾落後。二子當前救。須知物爲捕爾來。不爲我也。彼逆旅中所疑者。卽爾二人。未嘗及我。余聞言。卽曰。吾三人合而抵之。或同死於此。必不撒爾而去。矧此狗。但知捕人。安辨其爲爾。我撒克遜曰。

二孺子勿怯。善爲之備。惟吾初尙聞聲。今稍微矣。黎邦傾耳久之。亦曰良然。於是立馬更聽。乃無聲響。但風振黃蒿雜以蟲蛙之聲而已。時距余後者爲平原。直接天涯而沒飛走之物。皆匿弗見。想余去追騎已遠不爾。胡以寂無聲。兆黎邦曰。此時吾馬且斃。因伏鞍以手撫疲馬之咽。撒克遜曰。縱不聞聲。然尙未脫險。非更行咪許者。吾身尙據危地。惟吾不欲。余曰。丈胡不欲。當以見告。撒克遜曰。吾所不欲者。殊不令此馬聞險狀而驚。蓋馬耳趁風其警覺實倍於人。今馬息咻咻然似有所懾。不如趣行。余之知馬猶善游者之審水勢。非趣行不可。此時疲馬似知人言。竟努力而前。久之已而大慰。知追者萬無能及。舉念未已。忽咆哮之聲較前爲烈。似猛狗已踵。余後撒克遜曰。狗禍至矣。乃以靴釘觸馬腹直前。余大震。知狗繩已釋。其鋒乃不可當。似此猛物。無物足禦。今惟擇地與格。乃呼黎邦曰。趣前。今先治狗。此狗主縱此惡物於沙利巴利之間。黎邦曰。天乎。狗乃乘人耶。人言英國者。耶穌聖域。今乃殘忍至此。已矣。已矣。黎邦語已。犬聲復起。起於夜氣靜肅之中。且嗥且猛。其聲至樂。吾大懼。幾無地。

可以逃身。黎邦出刀曰：吾輩當止而與搏。余曰：不據形勝，亦無以取勝。着爾不觀迎，面有二石昂起耶？二石相距可數十武。余卽縱馬入石縫中，呼撒克遜同趣。而撒克遜之馬雖瘡，然去余可數百碼，已不聞余聲。余計大隊且立，至曰：今且勿顧撒克遜。爾踞彼石，吾距此石，待之卽借此二石以挫來鋒。惟倉卒勿下馬。余因立馬隱於石影中，以待相顧。惟二人各出刀於匣，卽馬上作勢，情極心靈，自念彼中人巽懦，棄人乃竟用狗當鼓動其氣，勿怯勿餒，方獲生機。計此狗臨身，非斷吾脰不止。於是心乃大擾，知此戰不同人類，爲宇宙中未有之奇戰。余握刃時，心緒已潮湧，頃之大聲驟發，因而復靜。但聞己馬嗅聲，馬嗅已復寂。忽見巨物作黑色，以鼻嗅地，脣張齒豁，在月光之下，直循馬迹而來，無左右顧。前後凡三巨獒，卽微光矚之，較前爲巨。此三獒乃不知有我，直奔撒克遜而去。余待二獒既過，不審其曾見余否。自衣囊出手槍，向第三獒待其近時，發而中之。獒大創，狂躍而起，遂不復嗅。黎邦繼發一彈，弗中。獒乃不知所嚮。黎邦忽曰：美克前二獒猛追撒克遜，果及者，撒克遜斃矣。余呼黎邦曰：趣

前救撒克遜受困無助且殆當往佐之黎邦趣馬前行馬似聞聲亦徐徐行余亦驅馬乃黎邦之馬強進亦不後余余曰將嚮何方覓之雖然撒克遜行必未遠彼云此去當覓立足之所或彼見我二騎不能及先自行矣黎邦曰彼馬雖迅必不能及此猛物矧物善嗅然逐馬迹而前已乃見一黑物殪臥則余前擊之一獒也余曰今但餘其二矣言次忽左嚮有彈聲余乃循聲而馳勒馬絕緊直穿林影而過聞犬嗥甚厲似得人矣彼此似相語以得意狀余知撒克遜必在是間黎邦結舌言撒克遜當不爲所得乎余聞言忽思獵犬得物必撕而碎之然則吾尸亦將碎於狗吻此時拔刃言曰苟吾火伴死者必以死復吾仇乃無憚荆莽驟馬而入忽覩異狀馬亦股慄當前有圓石爲月光所燭甚明麗石勢頗高可十五尺其狀至直其旁沙土爲風雨所磨盪乃光滑無倫然似有級可登者石上有人跏趺坐如石象則撒克遜也方吸菸斗神思夷然其下則二獒仰嗥如狂以爪搯石勢欲立登狗怒蓋不可極余瞬息之間見此狗微倦似欲遄反忽有一獒轉而向余直趣余頸余猛下一刃適中其鼻

獒乃奔越。血湧出不止。而仆黎邦則往敵其第二獒。然馬懼獒而仆黎邦前墜。幾膏犬齒。黎邦知已不救。余愕然。驟馬出槍趣獒。而發獒正奮。迅取吾友。忽爾顛頓。殪於道。周而黎邦已中狗爪。乃徐徐而起。想黎邦一生危險。無逾於此者矣。呼余曰。謝美克助我。我命汝所造也。後於軍中必當以此報爾。撒克遜亦下曰。我命乃出諸二君。後於軍中亦必以此報二君。語如黎邦也。今日之事。余命乃如屬絲。脫非君救我。吾雖飽革靴。革盡亦死。必無術以脫此危。嗟美克。汝何勇健。至是吾適脫落馬鞞。及頭巾爲狗所嗅。因而見及余。方拭劍血。問撒克遜曰。君馬安往。撒克遜曰。吾馬殆自求生。以獒方追我。我據石。馬乃弗見。須知吾急馳時。狗亦迅絕。吾槍偶一發不中。卽亦無時納彈。吾刃固利。至此乃不善其用。幸吾運佳。適經此石下。不審何人爲留此石。乃足延吾命。計此石必留以待人不令獒撲者。當余下騎時。至足僵不能履。石幾拔足於犬吻之中。非余跟後之鐵堅亦將爲犬所擒。余出二彈。其一似中言次。乃出自來。火燭死。獒呼曰。此獒身乃如篩。血星出。因問余曰。爾槍用何彈者。余曰。鉛耳。撒

克遜曰。既云鉛耳。何以有此玻璃之屑。且此一處。非瓶口耶。槍膛中。何由有瓶。余曰。天乎。此吾母所遺。回生丹之瓶也。納此一槍中。余既發他槍。彈出。因易此槍。忘其膛中。實瓶。故火發而瓶碎。尙有一狗。則鉛彈斃之。實則仰託天意。脫此瓶不出。膛而炸裂者。吾事不知如何耳。因曰。撒克遜丈人馬如何者。撒克遜曰。必得馬。無馬且殆。惟此空闊亂草之中。烏從得吾馬。顧吾意堅。必得馬而止。余曰。然。惟黎邦之馬。不能前矣。詎吾目炫耶。彼問何由有光。撒克遜曰。燐乎。實告汝。燐之光。不搖必燈也。蠟也。蘆莖也。人類所燃。斷非鬼火。黎邦曰。是中有火。必有人家。撒克遜曰。其非國家矛兵乎。設光中果騎士。又安知余爲何人。所執爲何事。脫不爾。或爲逆旅之少年。出而梗余道。彼敢更近吾劍尖。則斷不能留其命。今且勿論光中吉凶。必引馬近覷。於是三人引二馬揭水而渡。趣光而行。沿途行時。萬念起落。自謂果人居者。胡爲僻處於此。甯不被盜。去官道既遠。四顧無鄰。數家寥寥。居此。抑又何也。計程官道出。余後可數。咪。惟余防爲人偵。故取道出此。而此人家亦如余狀。結廬不近人境。世甯有如此之隱。

淪。三人雖行。然尙究詰無已。已而得矣。火光然處。山村也。他望皆莫見。惟面此始能得之。山村之前。有曠地。短樹如薺。樹中拓草場。撒克遜所失馬。卽嚙草於其中。余乃悟。此馬蓋迎燈光至也。撒克遜大喜過望。勒其馬同入小村之中。

第十章

此時燈光已引余涉水澤而來。光出諸圭竇之中。旣近。光乃斂紅。更至。則作深綠之色。射面如鬼。撒克遜枯瘠之容。映光尤兇暴。迨近其扉下。有異味出諸門中。空氣皆變。棘鼻欲噓。以山村幽僻。余三人復夤夜至此。撒克遜大愕。不知所爲。余及黎邦氣盛。必欲得其究竟。擬往偵之。撒克遜卻立余後。似別有所爲。余徐步至扉。以刀柄叩之。曰。吾爲行客倦甚。乞主人容我假息。中忽有聲甚窘。似觸金聲而動。又似嚴鑰其扉。聲復寂然。余思更叩之。則他扉啓矣。似有老人之聲呼曰。諸公聽我。此屋至狹。亦無佳糗。可以款客者。惟更行六咪。有阿美北利者。昔西亞卽屬其內。是中可得芻糗。足以供客。撒克遜曰。無及矣。是間雖陋。亦云人境。可以小駐。且吾馬中一馬已瘠。餘

馬亦不能勝。卽吾輩亦餒而莫進。敬乞先生拯我。拓簷下盈尺之地。容我三人。語未已。忽聞啟鑰之聲。已扉乃徐闢。而暗中陳說之老人。遂款款出。覺屋中燈燄至壯。余卽燈影背觀其人。高尚士也。雪髮盈頭。中蘊智球。貌至威毅。眉高而濃。長髯如沐。環頰而生。二目耿耿。然明鼻鈎如鷹喙。而體幹修偉。雖年齡已老。而狀尙未疲。自外觀之。又似宿將。衣黑絨之衣。狀頗古樸。屋中卑陋。隱君乃夷然棲止。卽呼余曰。二君似未經戰陣者。後一人則老將也。以狀卜之。似爲人所追逼而至。撒克遜曰。君何由知之。隱士曰。老夫少時。亦曾爲此。今人老目幸未老。但觀君馬受跟後之釘。已深知奔馳困極。且此少年所佩之刀。似非割肉殆刺人耳。君踪跡固不敢泄。而吾則能知。凡壯士甚惜其馬。今君馬當自位置吾家。無僕御。且不槽不秣。馬又胡飽。余三人遂入虛室。作長方形。依山而築。堂下羃以帷幔。狀甚陰悄。中寘火盆。紅燄尙爇。上懸銅鼎。及罏。列木案。陳玻璃雜器無數。尙有機器。乃不知名。但見玻璃瓶滿架。中貯流質。及粉質。至夥。東壁則積書滿之。尙有小案。列小皮閣。壁上懸巨圖。作細字無數。余入時。

藥香沁腦。知卽此銅鼎中。藥氣外洩。成此異香。隱士鞠躬爲禮曰。幸遇諸君臨此老屋。老夫爲勳爵查各辛尼俾人。黎邦曰。此其司麥勒俾耶。司麥勒俾者。臭腐物也。幸不爲老勳爵所聞。查各復言曰。客幸自覓坐。去其胄及甲。少甦。今且以老夫之寓爲逆旅。儘君自由。幸恕老夫了此試驗事。少須者。藥敗矣。撒克遜聞言。遂去甲胄。黎邦則倦臥於長榻之上。但倚其刀壁間而已。余則留心視主人所爲。主人之溫雅及其道氣。令余且駭且贊。查各語已。直趨爐次。觀其神情。似少須卽敗其藥者。力取木杓攪其藥。且傾入他鼎。色至黃濁。查各傾藥後。有喜色。似藥尙未敗。更於他器中出白屑投諸鼎中。屑入時。立沸作綠色。流質立清。不作黃濁色矣。查各灑清液。傾諸瓶中。而渣滓仍留諸鼎。查各滌鼎訖。移瓶置架上。迴面問余輩。神氣甚疏爽。曰。今且看庖丁治何食款客者。惟此藥芬甚厲。有觸佳客。今當力祛其氣。乃取少膠投諸爐中。炭復大熱。屋中芬氣。立變爲幽馥。查各乃出案幕作縞色。卽廚中出巨槃。食物及巨截。陳諸案上。請君自就其餐。於是三人同飯。查各曰。是間僻。無以爲敬。設余當日尙在

辛尼俾廣廳中者。款客當不止此。雖然物雖醜惡。頗足療飢。已而曰。吾尚有陳醞。語未已。直趨屋隅。出酒二甕。見余輩引滿後。乃退坐椽木榻上。引目觀余飲食。余且食且問主人。並述路中事。初未言道之所出。語未已。查各曰。諸君得毋赴蒙茅耶。諸君勿欺我。我卽知之。必不敗君事。第君輩宜自思。彼區區藩鎮。乃能敵雅各王旅耶。以是相較。似田家雞。驚試之久。鍊之鬪。雞安能卽蕘勝着。撒克遜曰。雞固村人所畜。然亦有恃。恃帥也。雖起義之人。自知其不勝。其視英國。猶之藥庫。義士則深願爲火星飛入。令之立爆。查各聞言。搖首曰。國力固不弱哉。今但問蒙茅何處。能得精卒。余曰。後備兵多。其心均屬蒙茅。撒克遜曰。尙有古議員之苗裔。苟見事發。亦必事蒙茅。隱君果知能集廣簷冠多涕之改正教徒。散諸五營。營衆果出諸長老會宗派者。將如蠅之集蜜矣。查各曰。聞君之言。非異教者耶。何由與吾事。吾國強弱。二教方競。壯士復奈何趨其弱者。撒克遜曰。以義相維弱者。得天鄙人固不與此。第旣爲人記。必不敢負其諾。責且余旣代傳書。則不能不終與其事。旣與其事。則當力助。蒙茅余亦無

計其爲雅各倭德爾爲雅各司禱爾矣。聞彼羽林久已屯聚而蒙茅則百無所備。吾卽身與其中相助爲理。亦所甚願。查各曰壯哉英雄之言。特其中有危局。首領行且不保。以蒙茅勢荏非敵。又將奈何。撒克遜曰此何能知。亦恃天命。查各曰請問少年郎君何爲亦趨危局。余曰小人係出自由黨。累世爲國民爭其自由。不以專制之教門爲可。吾翁老矣。執戕之役。出以代翁。查各問黎邦曰彼郎自由耳。郎何爲者。黎邦曰爲助友來不爲改正教來。查各曰老夫亦有所懷。凡人昌言助雅各司禱爾者。老夫必出劍與格。今茲老夫正以重事駐此。不能漫然從軍。不爾。老夫亦當從君輩西行。吾髮雖頽卽亦無惜。自計尙可任鋼盔。余辛尼俾之故堡尙存。老夫卽生長其間。其中死事者正爾匪鮮。自威廉御宇以來已爲聞家。凡堡中以小經營起家者。今皆富碩。老夫爲堡中間人。尤當以勳伐自見。毋論見囚見笞。受弓弦之楚撻。均所弗計。余曰如隱君言。事果弗集者奈何。語至此。老人大悅。輒言引滿弗靳。老夫此時心盼諸君成功。又祝舊教之懺懺者。死無噍類。雖然。老夫亦百戰餘生耳。當日查利第一

亂時老夫仗劍助之引爲骨肉之愛戰於意齊爾再戰於納斯俾大小二十戰所部均自出資餉之均佃夫厮養與家甲也天下戰局匪財不立已而度支乃奇絀舉一切家具爲銀製者悉錄而爲軍費如古英雄之所爲前此巨富之子皆以戰而貧於是出尺籍甯家伏而蘇息者逾時老夫經此敗衄尙未退縮尙罄所有助軍後此皇帝之成大業余與有力焉自是老夫爲皇黨蓋力扶王冠而使之端整者是民主黨乃大仇老夫老夫乃逃入夏鷹之舟出此地一刀外餘數錢而已撒克遜曰英雄所爲固爾吾道經日耳曼人人似皆豪俠無倫均如隱君也查各曰老夫當時尙從軍事魯易與拿破崙戰彈如雨集老夫弗餒同伴皆震老夫則極力慰撫令勿怖蓋老夫之行狀殊無愧爲英人聯軍撤後老夫復歸治化學以老夫生平所嗜但有此學撒克遜曰吾前日遇王師藍衣軍二人於沙利巴利彼亦談此查各聞言曰彼業何學堂撒克遜曰未知也查各復歎曰爲王肆力究無所得余極力報稱萬事皆空王乃以余司彈子房視余之罄家紓國若爲恆事報我僅以此耳撒克遜曰聞司彈

子房之役乃大佳。查各曰：此役何能加我。老夫亦乞王賜我以金。王曰：吾度支亦奇絀。老夫此數禮拜候朝命，乃不可得。同輩壯士功成，亦正如余。惟伺皇家支屬出而賭彈，以其餘利補我不足。朝廷之意，蓋欲以此彌吾已喪之產也。老夫久不得資，復面王自陳。王不悅，尋以勅書責老夫。言雖貧窶，不應以敝服入見。後此更以襤褸入者，屏不接，嗟夫。此戰將舍其身，破其家，乃以是見報，其不平何如也。三人同聲歎曰：悖理甚矣。且可恥尤甚。查各曰：雅各司禘爾族類，梟忍如是，甯能不使壯士寒心。老夫爲國故，盡貨其辛尼俾之產，今已赤貧，而子嗣復不肖，故亦聽之。撒克遜曰：隱君後此，胡以自立。迨以化學作點金術耳。願銅鐵能化爲金者，胡以隱君寶中鼎鑊，仍作鐵色。查各曰：金鐵各有所用，不必相侵而相假。余曰：君何由言此。此特下流社會懸度之詞。君奈何言此。凡有識之人，初未嘗作是言。昔者亞力山大居蘇格蘭，曾有是論。彼云：一千六百零二年三月，曾以鉛條在哈森家羅他敦村中化爲金。且屢爲之時，德皇羅東夫以三使者臨蒞驗其異。亞力山大竟於使者前試其術。後此授其

術於人。一爲佛利堡之佐亨。一爲士脫斯堡之嚆士登豪。未知有其事否。查各曰。有之。其術乃傳吾師撒克遜。曰。此術得毋傳及隱君乎。果能者。則吾身尙有甲冑及刀。與銜鐵。皆五金類。幸隱君爲我鎔爲巨金。查各曰。是焉能者。術固有之。然非久歷歲月。不可。天下欲富之人。安得驟富。非加以實功。亦無遽將收局之理。今泛論足矣。酒瓶已空。少年壯士亦倦。請早眠。消此殘夜。查各乃以氈褥陳諸地上。此士卒行營臥具也。方蒙蒙未御宇前。君輩攀鱗附翼。爲潛邸功臣。宜嘗此苦。老夫寢室。則窟山洞之中。今入息矣。言旣。執燈自入。黎邦自別哈文。恆不睡。見破氈列於地上。立枕馬鞍而寢。余及撒克遜坐火次。經時。撒克遜吸菸斗。已出其灰。卽曰。隱君爲此。殊不惡。爾不觀是間有鐵匱乎。我意是中必有金塊。殆此老所陶鍊。余曰。丈何由知之。撒克遜曰。汝不憶以刀柄叩戶時。是中似有所收拾。閉置諸隱處。吾心至警。苟有所觸。輒覺。此居。停似擲一重物於匱中。立闔其扇。吾自牆上燈光閃爍處。得之。匱中似有光氣。作黃色。吾思五金之類。恆不黃。黃其金矣。將力起發匱。余大怒曰。撒克遜勿爾。敢爾。

者賊也。彼居停之言爲汝而發。世安有是者。卽吾言亦傳聞而來。何由遽信。撒克遜曰。不如爾言。今但以短刃當立發此。當怨隱君不宜秘藏其金。不以授人。余曰。天乎。汝敢爾者。吾刃立加爾頸。撒克遜曰。少年人吾特作游幻之思耳。設藏金滿中。用爲戰場之錫賚。不甯佳乎。汝不聞其人爲保皇黨。力衛暴客。至爲人所屏。怨望無聊。始隱於此。余曰。我不之知。但令爾歸寢。否則我將告主人。首爾。撒克遜至不悅。嗷嗷作怨聲。遂臥於地。余亦假寐。然不敢寢。防此鼠竊。起行盜也。果爲無恥之事。又何以對此。隱君時聞雞聲。則天已明。余亦就枕。少息。

第十一章

遲明。卽飯晚來餘馘。往求吾馬。馬旣飽芻。遂行。方余輩撫鞍時。隱君忽至。捧甲冑呼黎邦曰。孺子。爾以單衣迎敵。非策也。且爾火伴周身皆鋼。汝獨無之。老夫前此留貽之甲冑。不審能稱身否。吾骨體巨。而汝身軀肥。或足相抵。余甲蓋巧匠爲之。卽御庫中所藏。亦僅如是。汝今試着之。黎邦如言。隱君曰。得此殊稱。往見蒙茅將。升汝爲雄。

將吾胄及甲皆本精鋼其緣皆飾以金銀甲中多銘詞均用以勗將士着甲讀銘能使精神振刷隱君目注亦動壯心卽曰爾勿哂我相君弗已須知壯士之身猶寶石必得鐵匣以秘藏之黎邦曰敬謝先生吾乃無辭以報余恨不能馳歸哈文面吾父母謂吾今日成將材矣隱君曰此甲良佳彈或弗入隱君言已視余曰尙有一物贈君君得此當記憶此時遇我方君入而面我時乃注睛吾書櫥之上此書爲名人格言爲英國民爭其利益則獵汀麥所著其人義士也壯士挈此以去師承書中所言足以步武名哲若鞍囊中吾尙贈君以重物至時爲上蒙茅語已向撒克遜曰此金塊敬以贈君此物至微若可用爲衣中之鍼以箝襟袂君得此足定爾心勿萌妄念亦以旌君朝夕於主人寢時不肱篋也余與撒克遜相視愕然似夜來語隱君皆已聞之隱君顧如是言而實不形慍色且示以道之所出並曰君第隨羊跡以行自合官道但出此道自不遇敵此道必出佛文興東二村落至於麥爾其地去布拉墩非遠更進則西摩瑟之邊余輩乃致謝隱君不已遂上馬行復至幽闐之所迴面乃不

見茅庵。以庵居山坳。爲勢絕隱僻。余歷小岡阜無數。四瞭一無所見。前覷則山石犖确。草木叢翳。直接天末。而此莽莽榛蕪。一無生物。但時時見脫兔衝馬而過。復見瘠羊力齧枯草。時見一二小徑。僅容一人一騎。至於騎不能通。乃轉向平原而趨。以小路爲繩。用作指南。遂縱馬於平原而馳。黎邦無言。時時顧其鋼甲。余於馬上亦時時見之。撒克遜俯首。亦似有思。余則深恥此老卒。乃欲行盜。晨起隱君餽金。適以增其媿。此老卒旣無感情。亦無媿心。余思極怒絕。忽呼撒克遜曰。遵此道行。撒克遜似覺。則握其刀柄。謂余曰。汝狂易發耶。胡爲叱咤英雄。余曰。然。汝乃知余。今輕汝矣。撒克遜大怒。勒迴其馬。面余曰。爾我同行至此。今當一校其藝。余曰。吾未欲與若鬪。且爾我無仇。若必欲一校者。咄嗟下馬矣。語時。亦出其巨刃。立馬待之。羅邦呼曰。嗟夫。天神勿論。爾何人。先動者。吾發槍矣。吾意固不欲若二人作此劇態。若不聽我。卽爲吾母之子。吾亦死汝矣。汝二人趣以刃歸。匣吾槍。俄頃卽發。撒克遜聞言。乃斂刃曰。孺子可教。乃敗老子興趣。已復言曰。美克勿爾。此戲耳。我亦同命。宜以大事爲鵠。勿爭。

小忿。且余年老爲爾父。執宜解事。不應與汝。嗷嗷作語。且尤須知爾少年血沸而語質。口不擇言。汝今當自明言。與心違言壯意。乃不如是。余曰。吾言直第過質耳。因亦微贊。其有容。撒克遜色定。余復曰。吾輩行爲乃大與丈忤。然尙可匡救。丈若懷憤。則非同命人矣。撒克遜曰。良哉壯士。令人欣悅。今前迹已過。且行吾事。雖吾刃非久處匣中者。出而試之。亦大佳事。語已。作短謳自娛。黎邦曰。此枯寂之原。移時竟矣。旋當及利俾亞沙磧之上。撒克遜忽南指曰。是間有煙。余以手翳目言曰。是必有人家。爲路尙遠。爲日光所映。故湧現於目睫之外。黎邦曰。是必興東第。吾新被甲。熱氣蒸騰。莫堪也。吾思苟脫此甲。固不成爲兵。然以重鋼加身。亦正如蟹之被殼。因面撒克遜曰。試問老將。果不受甲者。得毋與戰律悖乎。戰律三十九條。丈當熟聞之。撒克遜曰。凡從軍第一節。卽練被甲。今爾未臨陣。正爾練習之時。且爾不特練此。下此當宜兼習他藝中之宜學者。爾背槍於背。勿以膛口斜向人身。藥偶炸而彈發。將誤中人。黎邦聞言。駭然曰。吾尙憶夜來遇野獸。駭逸發槍擊之。空膛尙未納彈。今其納之矣。撒

克遜聞言曰。孺子所爲。安能從軍。似此控御。非爾馬調良者。汝墜騎久矣。汝躁而無靜理。槍空而無彈。設爲人所偪。能以空槍祛敵乎。汝被甲尙以爲窘。彼爲軍弁者。得之綦難。汝乃弗悅耶。幸爾氣高而心良。爲天所佑。不爾亦殆。黎邦忽大呼曰。老將勿饒舌。并騎行。幾推撒克遜墜騎。且曰。幸老將後此二言。足救其前失。非是我將出刃仇汝。以示壯士之不屈於人。撒克遜曰。汝迨欲效昨宵所爲耶。余悟此言。蓋指余以沮盜事。力與抗撓者。即曰。勿提前事。後此更勿呶呶。撒克遜曰。釁不兆諸我。我生性然也。乃累述其先代醜穢之迹。出之衍衍。余與羅邦笑不可仰。乃曰。若老將所言。直追責君之祖父。無義方之教。故出言無擇。爾述先世穢迹。於此事胡涉。撒克遜聞言似愧。乃亦無言。旋曰。彼山峯之上。有物高懸。似雉經罪人之架。何也。此間纒首之械。沿道林立。較英京碑碣爲多。蓋奸宄及叛賊。皆纒此架上。適足儲爲鴉糧。時已行經架下。其上挺然一死人。枯槁如腊。爲夏風所吹。往來旋轉。余輩立馬駐觀。見其下似有破衣一襲。落自尸身者。偪視之。則一老婦人。迴面下視。狀如神巫而兇頑之狀。盡

發露於外。余覩之大駭。較諸尸。腊尤凶。撒克遜亦大驚呼曰。死者恆與巫鄰。如磁之引鐵。是間多異教。恆爲此狀。爾試觀此巫之睛。至妖異可怖。衆宜堅備。勿爲所魔。黎邦曰。詎此巫待食死人肉耶。黎邦直引馬上視之。則人腊耳。黎邦曰。此餓。餓待麵包而食。何名爲巫。老婦人忽作異聲。出手於破衣之中。瘠如雞爪。力拾地上墜錢。錢蓋吾友所擲也。餓皮如羊皮。紙瘦骨柴立狀。若老鷓。又若小說中飲血之野。父余見餓。餓拾錢。卽問曰。似此廣漠之野。拾錢何爲。錢能充爾饑耶。餓不答。納諸衣底。防余奪之。且藏且吐。啞之聲曰。留以購麵包。余曰。餓何從得麵包而食。餓曰。佛文在邇。興東亦得小市。吾日伺於此行。必以夜撒克遜曰。是以竹問路而行耳。敢問餓。纒首於上者何人。餓曰。是卽殺我季子者。語時。怒目睨尸。出拘攣之手。推此尸。余見此餓之手與尸腊。正同。餓尙曰。是人實殺吾子。吾子遇彼。於是撲而殺我子。惜無仁人援我。因指其地。吾子之血卽殷於此。間惟吾子之血始結。此架上之果。吾守此久。無憚風日。觀此殘骨之受炎炙以消。吾殺子之恨。語時以肘支膝。以掌承其頰。睨此尸腊。余

曰。行矣。久將發。憊此婦人。猶哉。撒克遜亦曰。茲難耐。欲噉矣。今孰先發轡者。趣去此。濁婦人。二孺子。鬆其韁。且縱馬脫此流血之地。余輩乃以靴釘觸馬腹。肆力極奔。未移時。天氣全易。較諸前覩之尸及餓嫗。相去已遠。嗟夫。世界苟無兇殘之遇。何地不足寫心者。余馬已逾三昧之遠。處予之次。微見高原上。有村落。有禮拜堂之脊。出萬樹之杪。余立馬平原。忽得此村。心乃滋悅。人境中蒼綠彌望。入眼爽然。余曉行乃不見一人。舍飢嫗外。均荆莽。卽有所見。亦兩三拾薪之村童而已。余此時覺腰圍之帶日寬。知腹中已餒。曰。此村其麥爾矣。今未至布拉墩。當先經麥爾。此其是矣。計程當立至西摩瑟之邊。羅邦曰。吾知無幾時。羊肉之馨。當撲吾前。吾饑且死。以村景卜之。其中必有佳肆。市酒肉。撒克遜曰。今且勿論酒肉。試北望。何物者。已見天末一黑線。星光耀目。閃閃然。其行至迅。顧光氣相距。甚有序。勿亂。撒克遜曰。此馬隊過也。此必沙利巴利之軍。或王家以別隊出也。去我甚遙。吾目所及。正爲甲光。以大勢決。亦必至此村。特未審吾所決策如何。以吾之意。不如勿入。入且生疑。今當以他道赴布拉

墩乘隙得少駐圖飲食。黎邦曰：吾飢奈何？以吾身環甲如豆之處於鼎鑊中，轉瞬且逸出。嗟夫！吾爲改正教盡忠，收局乃復如是。撒克遜曰：得至布拉墩者，可以駐馬。蘇吾困，今吾馬尙未疲，可一旬鐘至。於是遂前，不入麥爾遠，遠就村外行，又經一村，村爲查利第二搏戰處，敗績逃身於是村者。村曰：倭西達沿道多農人，自西摩瑟出，以車載糧糗，西行濟師，毋恤其爲王師也。蒙茅也，但冀得錢而已。余遂卽村農口中得戰耗，時余三人已及戰地，然出諸村農之口述，乃不得其確耗，但聞亂兆而已。此時余所經村，小山隱然，溪流縱橫無數，余乃由石橋渡布羅河及一小鎮，卽余所欲趣之地。地距沃田之中，草木布野，余立高原迴望，乃不見騎隊，村中有老嫗爲余述威爾西兵曾經此，此外前後左右均無兵，余三騎遂自此村入巨鎮，得逆旅，因髣髴憶此地有禮拜堂一，殆其布拉墩乎？以通衢中，巍然見禮拜堂塔尖突出天半，余曰：是果爲布拉墩逆旅，主延余輩甚歡，少須已陳供具。

第十二章

逆旅中人多於蝨。雜以官弁及郵遞之人。往返咸趣戰地。尙有土著之人。亦羣聚探兵間消息。亦藉醉主人之良釀。主人曰。赫森三十許麗人也。當衆謹紛曉中。女主人引余入內室。余心滋適。意主人愛客之誠。殆此老將以語諷主人。主人大悅。主人者。清整而斌媚。性頗溫婉。此老將者。道行每遇婦人。勿論其爲舊教新教之人。咸以言語媚之。竟忘其爲五十以外人。恃其喋喋之口。無往不行其媚道。此時忽言曰。主婦聽之。我爲爾奴。本以供爾驅使。不圖此際。乃距主婦繡闥。於禮殊悖。顧旣蒙殊禮。胡不伸主客之分。與吾輩同飯。主婦曰。貴客乃下睽貧媪。吾何敢與列公抗顏行。撒克遜曰。天下名爲美人。則無人非平等。矧其流品。尤在英雄之上。雖英雄尤當低首。撒克遜此時百醜并露。似欲餐其秀色。且曰。主婦行者。我至不悅。必不獲己。我將起肩吾戶。主婦曰。客乃逾分禮。我今將赴地室。出陳醞供客。撒克遜曰。即有陳醞。主婦亦不能行。傭保安在者。奈何以貴重之玉指。自爲吾輩提挈吾焉。許汝者。因啟窗呼傭保。雜以毀詈曰。爾主婦恩厚。汝乃惰窳弗前。何也。傭保知旨。授酒於撒克遜。撒克

遜挈兩甌。傾赫森盃中。且自飲曰。美哉葡萄。肆中情備。非威力脅之勿動。赫森聞言。舉盃近脣。卽曰。此酒爲君壽。復向余曰。此酒爲兩少年壽。卽曰。此次亂事宜速靖。吾觀君擐此精甲。必爲皇家肆力。亂盪已矣。黎邦曰。朝廷命吾西行討賊。吾意指顧當平此亂。赫森曰。吾意非流血弗止。人言叛人。可七千人。叛人言兵鋒所至。必殺毋赦。劇哉盜也。天下文人。安能爲此。卽不爾。列肆寓客。亦足自聊其生。胡必以流血爲悅心之事。但觀戰場地冷。壯士足凍及股。較諸安眠於羽毛之衾褥。而地室中藏良醞無數。其苦樂又何如。主婦語時。目注撒克遜不已。余則以手引黎邦於案下。撒克遜復曰。亂事雖兆。而肆中生活。較前當倍。赫森曰。然前此承平日。售啤酒數筭而已。今則郡縣守令將弁。恆道出於此。或藉偵軍前消息。以故三日中所市酒值。敵一月弗止。且所售者。非麥酒。尤非火酒。咸良醞。每瓶可半幾尼。撒克遜聞言。稱羨不已。赫森曰。如此安謐之家。益以進款有常。獨憐吾夫彼得。不能更生。同領此好時光。言時去眼鏡以巾拭淚。不已。且曰。吾彼得佳士。顧乃弗祿。生時廣交而喜客。晚年體亦健碩。

乃如酒筭不圖收局如是。至今猶格格吾之胸際。且天下婦人之心。苟有念永永輒不能釋。黎邦曰。願女居停勿生悲懷。令人無歡。赫森曰。吾此時不思胖人矣。因流目射撒克遜。並曰。吾所屬意者不屬少年。蓋吾所相士。須中年而多力。且能媚婦人。始得相依。消吾日月。尤欲便給。助予承迎。過客而性質尤須近於經商之流。方屬吾意。須知此肆經年出納。可二百鎊。設想吾齊因赫森能更生爲吾夫者。必如是。吾始稱懷耳。撒克遜方欲有言。而肆外人聲譁潰。似客大至。女居停立盡其餘酒。傾耳窗外。忽聞有人言。必得密室飲杯酒。赫森貿易之心動。匆匆向撒克遜陳請。求出婦人。旣出。撒克遜曰。少年汝獨不見宇宙間有此尤物耶。吾此時已置蒙茅於度外。吾將移行帳於此。爲酒家。胡黎邦曰。世間果爲爾行帳所在。其下有地窖儲良醞。此汝之溫柔鄉。然以吾觀之。汝求安於此。其安亦足。逆料必無須臾之安。撒克遜曰。汝不觀此婦累顰其眉。蓋有所思。彼久已自薦於我。我何爲坐失其機。少年不知年入二百鎊耶。二百鎊之來胡易。亦不能拾諸塗次。夫酒家之胡。原不貴於王公。然以三十五年

之健卒。前無所嚮之時。而腰膂亦不類少年柔勁。奈何不能爲首邱之圖。先哲有言。凡雜種之人。語至此止。且微歎。余曰。門外胡爲人聲喧逐如是。復顧撒克遜曰。汝能深洞此婦人之隱耶。撒克遜未答。而扉已闢。見赫森入。作羞容。其後有頎頎之瘦丈夫。綴步而入。赫森曰。吾固信諸君彬彬雅之人。必不見罪。吾引此少年貴胄入室同飲。以他處房闈爲鄰村之客。充塞都滿。惟此靜室。稍足置榻酌。新客曰。良哉。主婦。我將自爲介紹乎。且言。且將金鑲小冠置諸脅次。出其手。鞠躬與余三人爲禮。俯幾及席。卽自承曰。吾爲君馴善之奴。幸廁文人之列。身爲勳爵齊伯司。食采於沙黎。今日幸與諸君相見。下官前此曾待罪比靖佛。黎邦曰。吾輩亦幸識公於此。此二君一爲西班牙貴人撒克遜。其一則勳爵美克克利克。而鄙人亦勳爵黎邦老卡俾也。二人本同居亨伯。齊伯司大悅曰。不期道途之間。乃逢佳士。言已。問曰。几上所陳何酒。詎愛立牽耶。噫。此童孺所飲。今宜易以醱釀紅酒。惟克拉勒佳。爲少年所宜。若西克之酒。則於中年宜。老年則又宜火酒。今託逆旅美人。趣以纖步往。吾渴甚。且吾昨夕飲酒。

多。而今日清爽如未洪醉。惟中酒後不敢銳進。但復渴而求飲酒。來勿遲。撒克遜此時無聲嘿坐。余觀其色似愠。睨視新客。余驚知將大鬩矣。計此獠一怒則收局較前爲惡。顧雖如是。幸但微咒數語。卽已。因然其菸斗以遏其怒。黎邦及余則靜觀新客之舉動。旣驚且喜。以客之品概及其舉動。大類小說中人物。入吾未閱歷之眼。則尤殊特可駭。余初見其服飾至隆貴。入眼已知爲非常人。面瘦而神清。隆準狀似貴族。而溫裕有儀。儵然瑤瑤之外。無戚戚容。二顴微白。目槽少黑。似行長道而辛楚者。以絨爲外衣。其長至膝。袴則赤錦爲之。薰香撲人。惟道中爲泥滓沙塵所污。色頗黯淡。然衣材絕佳。長靴沒膝。其一垂破。銀柄短劍懸於腰間。齊伯司以牙杖剔齒。音響甚怪。方余靜觀其狀時。而齊伯司倚於赫森所常止之榻。出象牙之梳理髮。且曰。不圖村間逆旅。乃有此多客。幾無投足之地。精室悉爲所得。此偷父得鏡與花露。何用者。吾今日滋悔。殆入蒙古中矣。撒克遜曰。郎君殆未及吾年。及吾年時。始知隨地皆爲佳境。齊伯司曰。其事甚類。惟吾年尙穉。憶在布拉墩中逆旅至佳。足以舒吾悃悞。忽

呼曰。酒至矣。傭保趣以三巨觥至。想此三君子。必降格與我同飲。赫森進觥遽出。撒克遜乘機亦隨之出。齊伯司則與余及黎邦談。似引余爲故交。且曰。君老伴。胡爲逐此孀雌同行。方余入門。與此婦行把握時。老伴似慍。不知此亦行人應盡之禮。何傷者。君友之猙獠。乃逾木金二星怪象。可怖也。觀此老伴。似亦久歷行間。余曰。然此老實百戰之餘。齊伯司曰。君輩何福。能與久戰之英雄同路。以吾度之。君輩似趣赴軍前。但觀急裝已得。余曰。吾輩將西行。與後備兵期。此時撒克遜不在。余遂不檢而言。齊伯司曰。君輩誰爲得毋墮其自由。爲雅各衛冠冕乎。抑助敵內嚮。與西摩瑟人合羣耶。吾命遽喪。則已。設一日不死。必隨揭竿者。掙雅各。余曰。壯哉。勛爵。奈何在逆旅中。昌言爲亂。設爲旁觀所得。告之有司。將加公以自由黨之名。捉將官裏去。旦夕誅矣。齊伯司曰。我胡惜此腐如爛橘之皮囊。生而怏怏。卽彼燒殺我。我亦莫箝其口。矧在下獄。矧余之入詔獄亦數。今更能與義士同命。甯非奇福。黎邦曰。然。百姓之戟矛與刀斧。森然咸動。齊伯司且斟其酒。且言曰。事無變革。何能維新。此逆旅女主人。亦

我心中所有。須知天下之寶。惟醇酒婦人及長劍而已。非是則世界黑闇於我。何取雖然。吾語垂罄。尙未得君輩行踪。務以告我。余曰。諒哉。足下萍水相逢。傾吐無隱。但恨余不能合君爲一。今此老伴去。余不敢質言。此老伴實爲吾輩領袖。每事須稟承其人而後發。今草草與君一談。於吾心亦不爲非適。客曰。君乃不能自辨薰蕕。決擇而出。以我卜之。二君之歲。必稍下於余。余腦筋散亂。無擇。故言之至質。若足下年髻雖少。較諸希臘之通人。慧穎爲多。但未知二君能容我作厮僕否。余曰。世安有是齊伯司。曰。願之。吾覓主人已久。不能更擇英偉之士如君者。今乘此機倪。自薦於足下。並自陳其事迹。以仰慰君子。請勿疑屏。吾志決矣。實告君。吾力定而膽壯。能作長短歌。舞劍馳馬。匪所不習。且能歌法國之歌。吾每歌時。聽者皆靡。足下傭僕。安得聰明如吾。至蹴鞠。雙陸。無不制勝。余均不屑其事。尤能以米爲酒。炙雞供饌。試問吾技。頗不惡否。余哂曰。多哉藝也。惟足下所陳之事業。傳我固無所用。意君好詼謔耳。貴族之人。何至降格爲人奴厮。齊伯司曰。無傷也。丈夫可貴可賤。吾不恥厮養之役。君

未知齊伯司在比靖佛中奄有田園數萬頃年得金四千鎊今乃乞身爲奴亦彌可晒趣以酒來爲我解穢余曰足下擁產如是之巨胡至四海無家齊伯司曰猶太之人負我聚其十族之衆謀我家遂毀黎邦曰家具罄乎齊伯司笑曰安能遽罄探囊出金鎊曰以此購良釀當不乏且有銀鑲寶刀及舊玉之煙壺與名表一具卽此數事已在百鎊以外似此餘剩之精神直同余當日之豪健今雖少弱其勢亦正類此酒家女傭之操行昔時貴重今淪厮賤且余尙有隨身梳刷之類足以備用一身之供此外何求凡諸所有稱余枯瘠之頸脊活潑之胸襟一雙之空拳赤手待價而沽詎不得一值耶余與黎邦不期失笑齊伯司猶陳其物事不已忽見余笑乃亦大笑於是哄堂齊伯司曰吾自傾家以來無是大噓今日樂甚趣以酒來更爲二君浮白余曰今晚尙須遠行安可洪醉又自念吾二人均村莊少年乃與此醉貓同命其事至危宜自警醒勿貽伊戚復面齊伯司曰觀君似出故家系實何出齊伯司曰先子爲是間勳爵欲引余至城市理業冀勿沈沒村間遂備宿衛之列長於羽林隊中

久乃甯家。以屋巨如廟。寥寥無以爲歡。因復歸朝。廷臣無不齒我。我又多資。乃與之拚酒。度其歲年。於是見識日靡。趨下如墜深谷。余曰。如是年費。當數千鎊。齊伯司曰。胡止於此。余蓄車四馬。盈吾廐。僕從如麻。又延得一詩人侍樽俎。所費不資。而此詩人乃作詩見刺。余仍弗省。復雜進流妓。歌以侑酒。而名士亦鱗集。余家。覲余如皇帝。以狀擬之。殆蜜益碎。萬蠅集矣。余曰。當時貴伐子弟。安在聽君。葛帔不生。故舊之情。齊伯司曰。此輩亦正妙。年不後於我。彼此不特無猜。而亦不審人間有貧薄事。惟余愧見斯人。設一造諸貴人。尙能爲余位置。顧不之屑。余曰。足下自願乞身爲奴。前此當曾思及。實告君。吾二者均村人。乃不知有奴。今足下果能合余而行。余請引君往。赴戰地。以狀卜之。當大勝於臨鏡。畫眉並以膠青刷鬢也。方余言時。忽聞有甲聲。行經甬道。撒克遜至。言馬已轡。宜行矣。余引撒克遜告以新客將逐余行。老將聞言大戚曰。天下能與此中落子弟共事耶。過此爲途。至蹇。戰爭亦劇。彼安能隨我。余曰。君不言蒙茅需將才乎。此人落魄能任戰。君胡不將之以行。撒克遜曰。是人不足用。彼

身薄如錦茵。但有外觀。中必無實。若以其名入尺籍中。主者當加收錄。惟斯人之出。身與冒險之局。相距至遠。余曰。吾亦云然。丈矚此妖姬。幾拒我不行。今乃增此佳伴。不甯佳耶。撒克遜笑曰。吾適有所畫。今決矣。問客曰。吾聞足下將引我爲伴。確乎。惟我輩武人無識。行次勿多言多事。足下甘否。齊伯司曰。甘之。撒克遜乃舉盃曰。良友新交。請飲此遠行之壽觴。客已喻意。亦報言曰。願諸君爲國咸大吉。天下善人匪不勝者。撒克遜曰。此語良佳。是必有效。甚願足下助我克集大勳。今足下試以手來。老將與執手爲禮。遂訂交焉。時余亦與肆主人赫森飲別酒。且還酒值。而赫森則注目老將。如怨如戀。不知所云。余輩慨然上馬。村人爭屬目焉。余勒馬直前。

第十三章

余騎所過小村。曰嘉利。曰珊孟墩。在牧場之次。萬樹環拱。小溪交橫。村中道由是出。叢綠四合。蓬蓬然。村隱於山間。地頗腴沃。可耕少須。輒見古塔。垂籐蒙絡。屋頂高逾林末。似是中有聞家焉。余道行。累見高屋多破裂。則已經兵燹。未修繕者。蓋亂軍曾

從此出。留此殘破之形。以示來者。余自念吾父苟見此。當不勝慨歎矣。沿道多農人作隊行。一自西而東。一自東而西。西來者多衰年及童孺。蓋自戰地逃出。尙有貧民自將其車。積寢衣及垂朽之家具。其後隨小車。以多毛之野馬御之。馬產自西摩瑟。生未調良。而御者復不善。累翻其車於溝渠之中。衆爭聚救。鬪訟不止。其西去者則大異。孑然一身。或攜囊或否。顏色皆赭。着吉莫靴。衣寬博之褐。自云其侶且續續至。余恆馳過其前。其人行必以羣。執巨椽之幹爲杖。謂遇盜足以爲械。行次輒謳。有和者。途修歌聲悠渺。至於不聞而止。余行時。有努目視余者。意以余爲官軍。亦有耳語。辨其非是。而疑卒不釋。其中尙有冠廣簷之冠。似清淨教之牧師。撒克遜曰。余入蒙茅界中矣。黎邦及齊伯司則已前行。是二人者均生材。老將言。將練之以成卒伍。余曰。此材亦未劣。丈不視此二人。體碩而儀觀壯耶。是二人者已專意向蒙茅大軍。老將曰。然。惟彼左股稍木強。何也。余曰。是殆遠行勤劬。因而至此。老將大矐曰。不圖吾今日乃見臨敵之人。股乃木強。如長刃之勁直。吾思彼承平之時。出刀如飄風。至遇

勁敵。勢或退。且爾不觀遠處有人耶。彼中有巨線。是必官軍。其行如盜。余呼吸中。似覺已入戰地。如年少時。孺子試聽之。吾幸不留滯於逆旅之中。余曰。邇來丈不蓄。兩心耶。老將曰。然。彼妹既美。境地復佳。至復可戀。孺子責我。我何辨之。有。顧妻子雖。大累人。而行軍之士。亦滋留意。蓋往往留意於其妻子。惜別離也。須知此身一出。何。日可歸。暴骨戰場。亦其素分。余蓋深嘗其滋味。達奴之戰。全軍皆覆。少婦之寡者。無。慮千數人。亦足哀矣。吾雖在軍。幸不爲京觀中物。今日與酒家婦語。婦欲嫁我。謂議。果定者。當不令我從軍。余心爲之動。幾欲從。是人以老且與立誓。凡後軍中所掠得。者。盡屬其人。如償責焉。余曰。丈所謀。滋佳。但恨不能止酒。亦成家之一累。今無論他。事。但問此新客隨我。其人果何如者。撒克遜曰。忠哉。吾輩苟同入騎士中者。無論何。人。均可與共事業。此勳爵齊伯司。余已論定之矣。以余觀之。較前之論定爲進。其人。少年。必不以戰事爲怯。第未知蒞敵何如。若外象觀之。似不後於古英雄之氣概。卽。蒙茅之爲人。亦平易近情。英雄入其殼中。無不鞠躬受令。汝不觀其人。勒馬前趨。頻。

頻迴顧余身。武冠幾及其額。胸博而鞭絲時拂其襟。際行如電。迅以赴戰。爲樂村農與彼同途。儀宇優劣之判。幾若天淵。是人氣質安詳。歷久定不變。卽遇梟將。彼之神宇當不驚駭。語次三馬同前。與齊伯司合雜村農行。或擁馬前。或落馬後。彼以爲官軍。狀頗惴慄。余馬驟奔抵人羣而進。道全人雜。幾壅滯。莫前黎邦及余。堅握劍柄。防爲所劫。齊伯司見狀。似嗤鄙此泯泯者。故與之爭道。勒馬告余曰。吾恨無酒。若得酒施其人。將終身識余惠。撒克遜曰。善備之。勿爲所襲。且爾不聞彼處大聲發耶。語未竟。聲果大動。馬前農夫忽變色爲野蠻。咸出器械。將與余鬪。呼曰。誅天主教民。彼殺屠者都盡。今吾輩亦當殲之。凡福利士丁騎士。當令盡死。勿留遺噍。衆聲雜動。有礮石投余。蚩然犯余耳而過。余輩惟有出刀自衛。無他術矣。輩中忽有牧師。排衆聲而向余四騎曰。來者助上帝耶。助巴爾耶。凡非吾類者。吾仇之。齊伯司勒馬問曰。敬問牧師。今茲衆中。誰爲巴爾。誰爲上帝。牧師曰。汝欲乞命。趣言此來爲雅各暴君乎。爲蒙茅聖主乎。撒克遜曰。汝輩乃能嚴辨清濁至此。可感也。吾實告汝。吾四騎實向改

正教牧師曰。聞爾言滋適。齊伯司曰。良友真國士。我佩汝矣。撒克遜見齊伯司與牧師言未已。卽驢入曰。余行半天下。力與雅各爲仇。今將往面蒙茅。第問牧師將安適。牧師曰。吾輩欲脫吾羈勒。但有此一途。牧師語已。乃向農夫議久。卽曰。公輩果向蒙茅。請以軍械屬我。撒克遜曰。否。天下英雄之士。安有授其刀柄於人以自敗其事者。將語已。卽曰。克利格。汝慎之。語未已。農夫大怒。爭舉其矛鋒向余四騎。牧師曰。衆勿譁。復面余曰。適所聞者。非語克利格乎。余曰。然。牧師曰。汝受洗時何名。余曰。美克。曰。汝居何地。余曰。哈文。牧師復進與一老人耳語。竟向余曰。汝果爲哈文。美克。克利格者。必能識一老將之名。其人在日耳曼。歷大小十餘戰。實盡心於改正教。余曰。非智西摩斯撒克遜耶。彼馬上者非歟。老人曰。伯什格魯。馬上少年所言確也。此人之名爲大帥。笛卡蘭保所定。吾聞笛卡蘭保言。是人必與克利格父子一人同來。今試問馬上少年。此三騎爲誰。余曰。一爲黎邦老卡俾。哈文人也。一爲勳爵齊伯司。沙黎人也。此二人者。自薦宣力於王之行帳。老人曰。美哉。不圖道左乃遇英雄。呼農夫曰。汝

輩聽之。此數文人者。均出世家。必善處吾輩。其宗旨亦與吾同。語已。農夫乃反顏媚余。爭擁余馬。去余鞵上之泥。並整余裾。有引手者。有祈禱者。意皆向余。四騎而牧師見狀。則力止此農夫。令上道。余輩四騎夾人羣中。牧師則居余與撒克遜中。牧師長瘦而濃。眉目眶深。陷時漏兇光。行次謂衆曰。查赫伯什格魯。吾名也。自審殊不足以張改正之教門。今但類司葡萄之老圃。引此善類西嚮。猶葡萄之成熟。以供此靡所不能之上帝。撒克遜曰。先生胡不部署其人成伍。以往。胡乃聽之。若羣鵝之隊。以待烹宰。且先生曾臨陣乎。須知災變之來。無有定期。苟道中遇敵。動卽宣戰。爲患正未可定。牧師曰。知之。吾惟託身於上帝。他無所怖。將軍須知。吾不欲列農民爲隊者。正防挑彼官軍之怒。因而撲我。吾意將此農夫束身入諸行帳。更與暴君一決。雖粉身碎骨無惜。今茲作無謂之鬪。吾至不欲。撒克遜曰。上智哉。惟道遇騎隊。亦須爲備。吾正患爾爲牧師。乃不得此羊羣。牧師曰。否。吾行牧久矣。安能冒入荆莽。以狀卜之。定平安入諸雅露撒冷。吾友當知吾心已嚮蒙茅麾下。且余近得消息。令余沿途物色。



將軍及信教之善士數人。吾東行時。即期與將軍合隊。今將軍何來。撒克遜曰。來自沙利巴利經。布拉墩牧師曰。道中何遇。撒克遜曰。無之。惟在沙利巴利中。曾一遇藍衣之卒。此外尙數見騎士於麥爾。牧師曰。王方調集宿將。咸能戰。車馬均備。且有馬飾。大似亞沙利亞名將。今惟求救主弗右其人。不爲盡力。且力抑其勇氣。不令向我。且引頸坐受吾戮。農夫皆曰。如心所願。牧師曰。爲道孔長。今當高歌以排吾悶。撒克遜曰。牧師良忠摯。果如是。我亦長歌以作氣。於是歌聲大震。衆皆引和。撒克遜歌已。牧師揚手述歌詞。農夫且歌且傾聽不已。撒克遜曰。歌詞至佳。足以動人。然黎邦與齊伯司則愕然不知所爲。撒克遜曰。此歌若在戰場中。當令壯士生其殺敵之心。牧師曰。果君同伴均如將軍者。則此矛隊中均義士矣。農夫皆鼓掌稱羨。牧師曰。將軍久歷戰事。吾請以所部託將軍領之。惟將軍號令是聽。撒克遜曰。君輩深信改正教。得吾爲之率。亦足慶矣。忽曰。吾目眩耶。胡以山樊之上。乃見刀光。然吾知之矣。必吾高歌動衆。引敵撲我耳。

上海图书馆藏书



A541 212 0000 4751B

梁 啟 超 著



歐 洲 戰 役 史 論

前 已 編 出

定 價 七 角

梁任公先生文章之價值，舉國所共知，論史之文，尤其特長。前此如意大利建國三傑等篇，讀者殆無不神飛肉躍。今茲戰役，因果糾紛，形勢詭異，非先生妙筆，孰能傳之。本館當戰事初起，即請先生編纂此書，幸承許可，而先生極鄭重其事，搜集材料，結構章法，幾經斟酌，致避囂外，竭全力以成之。本館敢信，無論何人一讀此書，必不能釋卷。非終篇斷不肯休，蓋先生之文，本有一種魔力，此篇又其精心結撰之作，故趣味洋溢，感人極深。一讀是篇，則事勢瞭如指掌，洵為人人不可不閱之書。

卷首并有先生手寫詩一首。詩格之雄深。書法之遒美。與本書可稱三傑。

完全上海華商及各埠商務印書館均有發售

(製)

(自)

學 校 儀 器 文 具

本館總發行所自新屋落成後。推

廣營業。特為 學界諸君 便於

採購 儀器文具起見。增設

發售儀器文具處 凡大

中小 各級學校師範實

業 等學校。應用理化、器械、藥品、

人體、動、植、礦、物 標本模型並

音樂、測量、繪圖、體操、各種器

具 與夫校中必需之墨水、

墨汁、墨膠、紙張、粉筆、

暨幼稚園恩物 等類。無不

全備以副 顧客之盛意倘

蒙 採購價目格外克己

(製)

(精)

文 房 用 品

本館為諸君購採 文房

用品 便利起見、聘請名

手、精選上等原料、督製仿

古、及新式各種 信箋信

封又仿製 湖筆徽墨

等、廉價發售 所有各

貨、花樣新奇、品物

精美較別家發售者迥

然不同 倘蒙 惠顧、無

論 躉批零售 一律歡

迎、在外埠者、可直接函購、

或就近向本分館購置亦

可、諸祈 公鑒、